

Pol ndê bapia ñamata-nga têtj lau Korin-nga Yom whê bapia dindéc sa-nga

Pol in ñgac ñamata-nga bu hoc ñawaê ñayham asê têtj lau yêc malac Korin, ma in kôm gwelenj mbo malac dau ñasawa hic baliñ ma kêdôhôn lau nanj sic hu sêkêñ whiñ Yisu (Apo 19:1-17).

Tiñambu Pol mbo whiñ ñac dom, ma ñgô ñawaê pi ñawapac daêsam nanj hôc asê lau sêkêñ whiñ-nga, ma ñac sêto bapia têtj in ma sêndac in bu whê yom ñatô sa. Tu dinañ-nga dec in to bapia dindéc têtj ñac, têtj têtj in dau mbo malac Epesas. Ñawapac ñatô nanj in to yom pi, nanj lau sêsa lêñ mockain-nga, sêwhê dandi kôc-kôc, señ Mwasin Dabuñ ña lêñ so, sêkôc gauc so pi yom datisa akêñ lau batê-nga, ma sêñyalê yom pi Ñalau Dabuñ ndê mwasin ñapep dom. Ma ñac sêtoc mwasin sêsôm yom awha wakuc-nga sa hôc gêlêc mwasin honj.

Pol to yom dindéc têtj lau Korin-nga, tigenj yom daêsam hêganônj lau sêkêñ whiñ-nga honj, ma gitôm bu puc yac dôñ bu datimêtê dauñ ñapep ma dasap mêtê ñayham dôñ.

Pol ndê yom ñamata-nga

¹ Aô Pol, nanj Anötö kêgalêm aô sa kêkuc in ndê atac whiñ dec gati Yisu Kilisi ndê †aposel. Alu yac neñ asidôwa Sostene ato bapia dindéc

² têtj Anötö ndê gôlôwac dabuñ yêc malac Korin. Alu ato têtj mac lau honj nanj ati lau dabuñ, ñahu

bu Anötö piñ mac dôn am damiñ Yisu Kilisi. Aêc, Anötö kêgalêm mac sa bu ati inñ ndê lau dabuñ, awhiñ lau akêñ gameñ hoñ, nañ sêtoc yac neñ Pômdau Yisu Kilisi ndê ñaê sa. Yisu tigeñ ti yac neñ Pômdau, ma ñac si Pômdau bocdinañ.

³ Mwasinñ ti yom malô têt mac, akêñ Damañ Anötö lu Pômdau Yisu Kilisi.

Pol gêm danje Anötö tu inñ ndê mwasinñ-ñga

⁴ Tôm bêc hoñ aô gam danje aneñ Anötö, tu mwasinñ nañ inñ kêt têt mac tu mac nem akêñ whiñ Yisu Kilisi-ñga.

⁵ Yomandô. Tu mac ati Kilisi ndê lau-ñga, dec Anötö ndê mwasinñ kêsalê mac ahuc, ma gêm mac sa bu anyalê Anötö ndê yom ma asôm yom dau asê.

⁶ Ma ñalêñ dinañ Anötö ndê mwasinñ puñ ñawaê nañ yac ahoc asê pi Kilisi, nañ ñahu sip ñalôm gi, nañ dôn yêc mac nem ñalôm.

⁷ Tu dinañ-ñga têt têt dindec nañ mac hoñ ambo ti tamkwê ñandô bu alic bêc nañ Anötö oc hoc yac neñ Pômdau Yisu Kilisi asê, nañ mac apônda Ñalau Dabuñ ndê mwasinñ danñ dom.

⁸ Ma Anötö oc puc mac dôn bu alhac ñanğa e bêc nañ yac neñ Pômdau Yisu Kilisi mbu meñ, dec mac oc alhac inñ anğô-ñga ti nem yom me giso mbasi.

⁹ Anötö nañ kêgalêm mac sa bu piñ mac dôn anem damiñ inñ ndê Atu Yisu Kilisi, yac neñ Pômdau, nañ gic bata bu yob mac ñalêñ dinañ. Ma yom hoñ nañ inñ gic bata têt yac, nañ oc kôm ñandô sa.

Yham dom bu Kilisi ndê lau sêwhê dau kôc

¹⁰ O asidôwai. Yac neñ Pômdau Yisu Kilisi kêkin aô bu wanem gwelenñ ñawaê ñayham-ñga wanem inñ

anğô, ma tu dinan-nga dec aö bu w anem la mac bocdec bu. Ahu nem mêtê awhê daôm kôc-kôc-nga sinj! Apiñ daôm dôñ ma ambo ti ñalôm tigenj bu mac nem yom ti gauc danj so dau dom.

¹¹ O asidôwai. Aö gasôm yom dinanj ñahu bu Klowe ndê lau ñatô sêkêñ puc aö bu mac nem lau ñatô sêsenj dandi e sêwhê dandi kôc-kôc.

¹² Aö ganğô bu mac nem lau ñatô sêsôm bu sêñkuc aö Pol, ma ñatô sêsôm bu sêñkuc Apolos, ma ñatô sêñkuc Pita, ma ñatô sêsôm bu sêñkuc Kilisi.

¹³ Oyaê! Mac gauc gêm sake? Kilisi whê dau kôc, a? Lau sic aö Pol lec ndu pi a gicso dau bu nem mac sa, a? Mac aliñ busanğtu aö neñ ñaê-nga, a?

¹⁴ Aö gam danğe Anötö bu aö kaku mac nem lau daêsam dom. Aö kaku Krispas lu Gaius.

¹⁵ Tu dinan-nga dec oc tôm dom bu ñamalac danj sôm bu mac aliñ busanğtu aneñ ñaê-nga.

¹⁶ Yomandô aö kaku lau nanj sêmbo Stepanas ndê andu sêwhiñ, magoc ñac lau dinanj eñ. Aö bu wanğtu mac nem lau ñatô whiñ, dec kalhiñ sinj su.

¹⁷ Kilisi kêkiñ aö bu wanğtu lau dom, magoc inj kêkiñ aö bu wanem mêtê. Ma ñawaê nanj gahoc asê pi Kilisi ndê mbac ndu pi a gicso dau, nanj yom ti ñaclai atu. Bocdinanj aö tanğwê gauc atu-tu nom-nga bu nem aö sa tu wanem mêtê-nga dom. Mba! Aö gatec bu wakôm a gicso dau ndê ñaclai ti gêñ ñambwa.

Kilisi tôc Anötö ndê ñaclai ti gauc atu asê

¹⁸ Aö gasôm yom dinanj, ñahu bu ñawaê pi Yisu ndê mbac ndu pi a gicso dau, tôc Anötö ndê ñaclai asê têtj yac lau nanj inj bu nem yac si. Magoc lau

nañ sic waê bu sêninga, nañ sêngô yom pi a gicso dau gitôm yom gauc mbasi-nga.

¹⁹ Bu sêto Anötö ndê yom dan yêc bocdec bu:

Lau ti gauc atu-tu nom-nga, ma ñac nañ gauc gêm bu sênyalê gêñ hon ñahu, nañ wasen ñac si gauc su, ma watôc asê bu gêñ ñambwa. *[Ais 29:14]*

²⁰ Bocdinañ, mac lau tigua ma gwalam akwa ma mac lau nom-nga nañ anjahê bu akip gêñ hon ñahu sa, mac nem gauc dau ñandô nde? Anötö tôc asê bu ñamalac si gauc atu-tu nom-nga, in gitôm gêñ gauc mbasi-nga.

²¹ Ma in tôc in ndê gauc atu asê bocdec bu. In kôm bu lau nom-nga sêtôm dom bu sênyalê in ña ñac dau si gauc. Ma in ndê ñawaê ñayham nañ yac ahoc asê, nañ lau nom-nga sêlic bu yom gauc mbasi-nga. Tigen Anötö dau gêlic ñayham bu nem lau nañ sêkêñ whin ñawaê dau, nañ si.

²² Lau Israel-nga takwê bu sêlic gêñ dalô. Ñac bu sêlic, dec oc sêkêñ whin. Ma lau Grik sênyalê yom ti gauc atu, bu sêngô dec oc sêkêñ whin.

²³ Magoc yac mba mêtê hêganôn Kilisi ti in ndê mbac ndu pi a gicso dau. Yom dau kêkuc gêñ nañ lau Israel-nga takwê, nañ dom, ma bocdinañ dec sêkêñ whin dom. Ma lau Grik sêlic gitôm yom gauc mbasi-nga.

²⁴ Magoc lau Israel ti lau Grik bocke nañ Anötö kêgalêm ñac sa sêti in ndê, nañ sêkôc yac mba yom pi Kilisi sa, ma sênyalê bu in Anötö ndê ñaclai ti gauc ñahu.

²⁵ Bu gauc nañ Anötö kêkuc, dec kêmasañ lêñ bu Yisu sip nom men ma mbac ndu pi a gicso dau, nañ lau sêlic bu lêñ gauc mbasi-nga. Magoc Anötö ndê

gauc dau hôc gêlêc ñamalac si gauc atu-tu honj. Ma Anötö ndê lêñ dinañ, lau sêlic bu lêñ ñaclai mba-ñga, magoc hôc gêlêc ñamalac honj si ñaclai su.

²⁶ O asidôwai, akôc gauc pi daôm. Têñ ndoc mac anğô ñawaê ñayham tiwakuc ma atap Anötö ndê galem sa, nañ mac ambo atôm lau tığauc me lau ti ñaclai atu, me lau tiwaê? Mba!

²⁷ Anötö tac whiñ bu êñyaliñ lau nañ lau nom-ñga sêlic bu lau gauc mbasi-ñga, ma lau ñaclai mba-ñga, nañ sa, tu bu kôm lau tığauc ma lau tiñaclai maya sa têñ bêc ñambu-ñga.

²⁸ Lau nañ lau nom-ñga sêpu ma sêlic bu lau waêmba ma lau ñambwa, nañ Anötö kêyaliñ ñac sa, tu bu êñgwininñ lau nañ sêtoc dau sa-ñga.

²⁹ Tu dinañ-ñga dec gitôm dom bu lau dan sênğiyañ dau sa yêc Anötö anğô-ñga.

³⁰ Bu Anötö dau piñ yac dôn tam damiñ Yisu Kilisi, nañ ti yac neñ gauc ñahu. Ma Kilisi dau ti yac neñ ñahu dati lau gitên ti lau dabuñ-ñga, ma inñ ti ñahu Anötö gêm yac si-ñga.

³¹ Bocdinañ, anğkuc yom nañ sêto yêc, nañ sôm bocdec bu:

Asa nañ bu po dau sa, nañ po dau sa tu Pômdau-
 ñga eñ. *[Jer*
9:24]

2

Pol gêm mêtê ña inñ dau ndê gauc ti licwalô dom

¹ O asidôwai, gauc nem têm ñamata-ñga nañ aö gahôc asê mac. Têñ ndoc dinañ aö gahêgo dauñ pi yom ñayham-ñayham me yom ti gauc atu-tu tu bu wawhê Anötö ndê yom sa têñ mac-ñga dom. Mba!

² Aö gahu yom pi gêñ daêsam siñ, ñahu bu aö gauc gêm tidôn bu wasôm yom pi Yisu Kilisi tawasê, ma pi in ndê mbac ndu pi a gicso dau.

³ Têñ têm aö gahôc asê mac, nañ aö gamen tôm ñgac ti licwalô dom. Aö gatôc daun ma katitec ñandô tu gwelen nañ Anötö kêñ sip aö aman-ña.

⁴ Ma aö gam mêtê ti gasôm yom têt mac kakuc gauc atu-tu nom-ña tu wambac yom mac-ña dom. Aö gasôm aneñ yom ma Anötö ndê Ñalau tôc in ndê ñaclai asê bu puc aneñ yom dôñ.

⁵ Ñalêñ dinañ mac nem akêñ whin ñahu sip aneñ gauc me ñamalac si gauc dom, magoc sip Anötö ndê ñaclai.

Ñalau tôc Anötö ndê gauc atu asê

⁶ Bocdinañ, têt ndoc yac bu anem mêtê, nañ tankwê gauc atu-tu nom-ña tu puc yac mba yom dôñ-ña dom. Mba. Magoc yac bu ambo awhin lau nañ sêkêñ whin ñanga, nañ dec oc tôm bu yac asôm yom ti gauc atu-tu têt ñac. Magoc yom dau kêkuc lau nom-ña si gauc, me gôliñwaga têm dindec-ña nañ oc sêniñga, nañ si gauc dom.

⁷ Mba. Yom nañ yac ahoc asê, nañ kêkuc Anötö ndê gauc, ma hêganôn lêt nañ in kêmasañ mun-ña andô lê, tu bu nem yac lau nañ dakêñ whin Yisu, nañ si, ma datap in ndê ñawasi sa. Lêt dau kêkuc in ndê gauc atu, nañ ñahu sip ñalôm gi, ma yêc siñ dau têt lau nom-ña.

⁸ Gôliñwaga têm dindec-ña dañ sêñyalê lêt dau ñahu dom. Ñac bu sêñyalê, dec oc tôm dom bu sêkic yom bu sêndic Pômdau Ñawasi Ñadau ndu pi a gicso dau.

⁹ Magoc ñac sênyalê dom. Tôm Anötö ndê yom nañ sêto yêc muñ su, nañ whê sa bocdec bu:

Gêñ ñayham nañ Anötö kêmasañ gwanañ tu lau nañ atac whiñ in-ñga, nañ lau dañ sêlic dom, dañ sêngô ñawaê dom, ma lau dañ sênyalê dom. *[Ais 64:4]*

¹⁰ Tigen Anötö ndê Ñalau tôc gêñ dau asê têtñ yac. Bu Ñalau dau kip gêñ honñ ñahu sa, ma kêyalê gêñ honñ. Ma in kêyalê Anötö ndê gauc atu-tu, nañ ñahu sip ñalôm gi, nañ whiñ.

¹¹ Anğô! Asa gitôm bu ênyalê yom nañ ñamalac dañ gauc gêm yêc ndê ñalôm? Lau dañ sênyalê dom, magoc ñamalac dau ndê ñalau kêyalê in ndê gauc. Ma bocdinañ lau dañ sênyalê Anötö dau ndê gauc dom, magoc Anötö ndê Ñalau tawasê kêyalê.

¹² Anötö tac whiñ bu yac tañyalê mwasiñ nañ in kêñ têtñ yac ñambwa. Tu dinañ-ñga dec ñalau nañ in kêñ têtñ yac, nañ ñalau nom-ñga dañ dom, magoc in dau ndê Ñalau.

¹³ Ma yac ahoc yom asê pi Anötö ndê mwasiñ dau. Magoc yac asôm yom añkuc gauc atu-tu nañ lau nom-ñga sêtoc sa, nañ dom. Yac asôm asê têtñ Ñalau Dabuñ kédôhônñ yac. Yom ñandô pi gwelenñ nañ Anötö kôm tu yac neñ gatun-ñga, nañ yac asôm asê têtñ lau nañ Ñalau Dabuñ mbo ñac si ñalôm, añkuc yom ti gauc nañ Ñalau dau kêñ têtñ yac.

¹⁴ Magoc lau nañ Anötö ndê Ñalau mbo ñac si ñalôm dom, nañ oc sêtôm dom bu sêkôc yom nañ Ñalau dau kédôhônñ yac, nañ sa. Ñahu bu ñac sêlic gêñ dau gitôm gêñ gauc mbasi-ñga, ma têtñ dom bu sênyalê. Ñalên tigen nañ têtñ bu sênyalê, nañ Ñalau Dabuñ whê ñac si gauc sa.

15 Bocdinaŋ yac lau naŋ dakôc Nalau Dabuŋ sa su, naŋ datôm bu taŋsahê ti taŋyalê gêŋ hoŋ ŋahu. Magoc lau naŋ sêkôc Nalau sa su dom, naŋ sêtôm dom bu sêŋyalê yac neŋ ŋahu.

16 Gauc nem Anötö ndê yom daŋ, naŋ sêto yêc bocdec bu:

Asa kêyalê Pômdau ndê gauc, ma asa gitôm bu êndôhôn in? *[Ais 40:13]*

Lau nom-ŋga daŋ sêŋyalê dom, magoc yac taŋyalê, ŋahu bu Nalau Dabuŋ tôc Kilisi ndê gauc asê têŋ yac.

3

Lau Korin-ŋga sêkêŋ whiŋ gwalec

1 O asidôwai hac. Têŋ ndoc aö gambo gawhiŋ mac, naŋ aö gasôm yom têŋ mac tôm gasôm têŋ lau nom-ŋga naŋ Nalau Dabuŋ gêm gôliŋ ŋac dom. Nahu bu mac atôm balêkoc dedec tu nem lêŋ akêŋ whiŋ Kilisi-ŋga.

2 Yom naŋ aö gasôm têŋ mac, naŋ tôm aö gakêŋ mac anôm su ŋambwa. Bu mac atôm balêkoc dedec naŋ sêtôm dom bu sêneŋ gêŋ ŋaŋga. Ma kwahic d ec aö galic bu mac ambo bocdinaŋ ŋapaŋ.

3 Nahu bu tôm bêc hoŋ mac am lêmuŋ ti asenŋ daôm ŋapaŋ. Mac asap lêŋ nom-ŋga dôŋ ŋapaŋ, dec tôc asê bu mac aŋkuc lêŋ ŋalôm akwa-ŋga, ma Nalau Dabuŋ gêm gôliŋ mac nem lêŋ dom.

4 Bu mac awhê daôm kôc-kôc, ma mac nem lau ŋatô sêsôm bu sêŋkuc aö Pol, ma ŋatô sêsôm bu sêŋkuc Apolos. Mac nem gauc dinaŋ in gauc nom-ŋga ŋambwa.

Aposel sem gwelenŋ sêtôm lau akiŋ ŋambwa

⁵ Aö bu wandac mac bu Apolos i ñ asa? Ma aö Pol dec aö asa? Anğô su nañ. Yac lau akiñ ñambwa, nañ ahoc Pômdau ñawaê asê, ma tu ñawaê dinañ-ñga dec mac akêñ whiñ iñ. Yac akôm mba gwelenj têtñtêtñ tôm iñ kên têtñ yac.

⁶ Aö d auñ gatôm ñgac nañ sô gêtñ ñawhê sip nom. Ma Apolos iñ gitôm ñgac nañ kêsôwê bu sip gêtñ ñawhê nañ aö gasô. Magoc Anötö dau kôm gêtñ dau po pi meñ.

⁷ Bocdinañ atoc ñgac nañ sô gêtñ, me ñgac nañ kêsôwê bu, nañ sa dom, bu alu ñgac akiñ ñambwa. Atoc Anötö sa, bu iñ kôm gêtñ po tiatu.

⁸ Ñamalac nañ sô gêtñ ñawhê, ma ñamalac kêsôwê bu sip-ñga, iñlu lu-lu si gwelenj ñahu tigenj. Ma Anötö oc kên ñaôli têtñ iñlu, êñkuc gwelenj nañ iñlu sêkôm.

⁹ Gwelenj ñawaê ñayham-ñga nañ yac akôm ambo mac ñalôm, nañ gitôm yac akôm gwelenj yêc yac mba ôm têtñtêtñ dom. Mba. Bu mac honj atôm Anötö ndê ôm tigenj, ma yac atôm iñ ndê lau akiñ nañ akôm gwelenj yêc ôm dau.

Gôlôwac dabuñ sêtôm Anötö ndê andu

Ma mac atôm Anötö ndê andu nañ iñ bu kwê sa.

¹⁰ Tôm Anötö ndê mwasin puc aö dôñ dec aö gam mêtê mac. Aö gakôm gwelenj dinañ gitôm gwalam akwa kwê andu-ñga, nañ kêsuhunj alhö sip nom gi. Ma lau ñatô nañ sem gwelenj mêtê-ñga sênkuc aö, nañ sêtôm lau nañ sic dañ ti lêlôm ma akiñkwa pi alhö nañ aö kasuhunj muñ su. Mac lau asa nañ bu akôm gwelenj tu andic dabinj andu dau-ñga, nañ ayob daôm bu akôm gwelenj dau ñapep eñ.

¹¹ Bu Yisu Kilisi tawasê in ti yac neŋ dakêŋ whin ŋahu. Kilisi dau gitôm alhö naŋ Anötö kêŋ bu lau sêkwê andu pi-ŋga, ma alhö ŋandô dan yêc dom.

¹² Lau ŋatô sêkôm gwelen ŋayham tu bu sêkwê andu sa pi alhö dau, naŋ gitôm sêkwê andu ŋa gol me silba me hoc ŋayham. Magoc lau ŋatô sêkôm gwelen bambalin, naŋ gitôm sêkwê andu ŋa gêŋ ŋambwa gitôm kwan me a babalê.

¹³ Têŋ bêc ŋambu-ŋga Anötö oc êŋsahê lau tigen-tigen si gwelen ŋa ya, ma ya oc tôc ŋac si gwelen ŋa-ŋandô asê tiawê.

¹⁴ Ŋac naŋ sêkôm gwelen ŋayham, naŋ si gwelen ŋa-ŋandô oc gacgen yêc. Ya oc neŋ su dom, ma ŋac oc sêtap si ŋaôli sa.

¹⁵ Magoc ŋac naŋ sêkôm gwelen bambalin, naŋ ya oc êŋsahê ŋac si gwelen ma neŋ hon su niŋga. Ŋac lau dau oc sêwê sa yêc yawahô, magoc ŋac si gwelen ŋandô dan oc gacgen yêc dom.

Lau sêkêŋ whin-ŋga si ŋahu yêc nom dom

¹⁶ O lauhac! Mac atôm Anötö ndê lôm dabuŋ, ma Anötö ndê Ŋalau mbo mac nem ŋalôm. Mac aŋyalê yom dinaŋ, me mba?

¹⁷ Yomandô, mac atôm Anötö ndê lôm, ma lôm dau in gêŋ dabuŋ. Tu dinaŋ-ŋga asa naŋ kôm Anötö ndê andu dabuŋ tisac, naŋ Anötö oc kôm in tisac bocdinaŋ.

¹⁸⁻²⁰ Ansau daôm pi gauc naŋ lau nom-ŋga sêlic bu gauc atu-tu, naŋ dom. Bu gauc naŋ lau nom-ŋg a sêlic bu gauc atu-tu, naŋ Anötö gêlic tôm gêŋ gauc mbasi-ŋga. Tôm yom naŋ sêto yêc, naŋ sôm bocdec bu:

Gauc atu-tu naŋ ŋamalac sêtoc dau sa pi, naŋ Anötö oc nem kwi ti ŋac si akô bu sêsip sêndi-ŋga. *[Job*

5:13]

Ma yom dan tiyham sêto yêc bocdec bu:

Pômdau kêyalê gauc naŋ lau nom-ŋga sêtoc sa ti gauc atu-tu, ma inŋ gêlic gitôm gêŋ ŋandô mbasi-ŋga. *[BW*

94:11]

Bocdinaŋ, mac nem asa naŋ gauc gêm bu inŋ ŋamalac ti gauc atu-tu pi gêŋ nom-ŋga, magoc kêyalê Anötö dom, naŋ hu gauc nom-ŋga siŋ, ma ti ŋamalac gauc mbasi-ŋga. Ma ŋalêŋ dinaŋ dec oc tôm bu inŋ ti ŋamalac tigauc yêc Anötö aŋgô-ŋga.

²¹ Bocdinaŋ dec atoc daôm sa tu aŋkuc aö Pol, me Apolos, me ŋamalac dan-ŋga dom! Bu gêŋ ŋayham hoŋ naŋ tôm bu po mac sa, naŋ meŋ akêŋ Anötö tigenŋ.

²² Inŋ kêkiŋ aö Pol, lu Apolos ma Pita atôm lau akiŋ, tu bu anem mac sa-ŋga. Ma mac nem gamenŋ ambo-ŋga ti nem têm ambo tamli-ŋga ma têm ambac ndu-ŋga, gêŋ naŋ kwahic dec sêmbo ti gêŋ naŋ oc sêhóc asê tiŋambu, gêŋ hoŋ dinaŋ Anötö ti ŋadau ma kêŋ têtŋ mac bu nem mac sa.

²³ Ma Anötö tigenŋ piŋ mac dôŋ am damiŋ Kilisi, ma Kilisi ndê ŋahu yêc Anötö dau.

4

Lau aposel si gwelen ti sakin

¹ Bocdinaŋ, alic yac atôm Kilisi ndê lau akiŋ ŋambwa, naŋ inŋ gêlic yac atôm bu akôm inŋ ndê gwelenŋ, dec kêŋ Anötö ndê yom naŋ ŋahu sip ŋalôm gi, naŋ sip yac amanŋ.

² Ma yac honj tanjalê su, bu yac neñ ñadau bu kêñ gwelenj sip yac amanj, nanj dayob ñapep dandic ñawaê.

³⁻⁴ Bocdinañ inj lêt solop bu yac datôc gwaninj yac neñ gwelenj ti sakinj tu bu tanjahê bu yac akôm ñapep me mba. Aö neñ atac pa su pi gwelenj nanj Anötö kêñ sip aö amanj. Tigenj yom dinañ whê aö sa bu aö ñgac akinj gitênj lec dom. Aö gahêgo daunj tu gauc bocke mac akôc, me lau ñatô sêkôc, me aö daunj gakôc pi aneñ sakinj-ñga lec dom. Bu Pômdau tawasê ti ñadau bu êñsahê aö-ñga.

⁵ Bocdinañ gauc nem bu anjahê lau pi ñac si lêtj ti sakinj ñagahô dom, ahônj Pômdau ndê bêc bu mbu meñ-ñga. Têñ dinañ gêñ nanj sinj dau yêc ñasec ñalôm, ma gauc honj nanj yêc ñamalac si ñalôm, nanj Pômdau dau oc hoc asê tiawê. Ma têtj dinañ lau honj nanj sic waê bu sêtap waê sa, nanj oc sêtap sa akêñ Anötö tòm ndi.

⁶ O asidôwai hac. Aö gato yom dinañ pi alu Apolos gitôm yom gôlinj danj, tu bu wawhê mac nem gauc sa-ñga. Aö bu wandôhônj yom ñalhô danj têtj mac, nanj sêsôm bocdec bu, “Ayob bu akôm gêñ danj so Anötö ndê yom nanj sêto yêc, nanj dom.” Mac bu anjalê yom dau ñahu, dec oc tòm dom bu mac atoc ñamalac danj sa hóc gêlêc danj su.

⁷ Am asa nanj toc daôm sa, nanj ñgô. Asa sôm bu am hóc gêlêc lau ñatô? Ma am nem gêñ sake yêc, nanj am tap sa yêc Anötö ndê dom? Ma am nem gauc ti gêñ ñayham honj bu meñ akêñ Anötö, dec tu sake-ñga am toc daôm sa bu am nem gêñ honj ñahu am daôm?

⁸ Bocke? Anötö ndê mwasiñj kêsâlê mac ahuc su, a? Mac gauc gêm bu mac atôm lau ti lêtôm Anötö

ndê mwasiŋ-ŋga, a? Mac atap têm ŋambu-ŋga sa su, dec andöc atôm kiŋ ma kwini ma am gôliŋ awhiŋ Kilisi, magoc yac hic lec mba, a? Oyaê! Têm dau bu meŋ sa su, dec oc ŋayham kêlêc, ma bocdinaŋ dec oc tôm bu yac hoŋ danem gôliŋ dawhiŋ dauŋ. Magoc mba!

⁹ Bu yac lau aposel ambo nom atôm lau waêmba naŋ atinambu lau hoŋ, ma atôm lau naŋ sêkic yom bu sêndic ŋac ndu. Aö gauc gêm bu Anötö kêgwiniŋ yac ma kêŋ yac ambo bocdinaŋ atôm dôhôŋ bu lau hoŋ ma aŋela sêwhiŋ sêlic.

¹⁰ Tu Kilisi-ŋga dec lau nom-ŋga sêlic yac atôm lau gauc mbasi-ŋga. Magoc yêc Kilisi ndê lau ŋalôm, mac apo daôm sa bu ati lau ti gauc atu-tu, a? Yac lau licwalô mba, magoc mac lau ti licwalô atu, a? Bocke dec mac lau ti waêm, magoc yac hic lec lau waêŋ mba?

¹¹ Ŋasawa baliŋ su e meŋ têtŋ kwahic dec, yac ahôc ŋawapac daêsam. Gêŋ yô yac, bu yô yac, yac mba ŋakwê mbasi, lau sic yac, ma yac mba gamenŋ andöc-ŋga mbasi.

¹² Yac amanŋ am gwelenŋ atu tu akôm kwanŋ dauŋ-ŋga. Lau sêpu yac, tigenŋ yac am mbec ŋac ô. Sêkêŋ kisa yac, magoc ahôc ti atac pa su.

¹³ Lau sêsec yac, magoc yac asôm yom malô ô. Sêlic yac atôm gêŋ ŋapopoc nom-ŋga ŋambwa. Ŋawapac kaiŋ dinaŋ yac ahôc ŋapaŋ.

¹⁴ Aö gato yom dinaŋ tu bu wakôm mac mayam daôm-ŋga dom. Mba. Aö galic mac tôm anenŋ balêkoc atac whiŋ-ŋga, ma tu dinaŋ-ŋga dec gato tu wakêŋ puc mac-ŋga.

¹⁵ Yêc Kilisi ndê gôlôwac dabuŋ ŋalôm, lau daêsam

sêmbô, nañ sêtôm bu sêndôhôn mac. Tigen tôm dom bu mac alic ñac tôm damami. Magoc aö galic daun tôm mac damam, ñahu bu mac akêñ whiñ Yisu Kilisi tu ñawaê ñayham nañ aö gahoc asê pi in-ña.

¹⁶ Tu dinan-ña dec wañgilí mac bu añkuc anen lèn.

¹⁷ Ma bocdinañ dec aö bu wañkiñ Timoti tèn mac loc. In sap Pômdau dôn ñanga en, ma in anen balé atac whiñ-ña solop. Anen yom ti lèn hon nañ gasa tu kakuc Yisu Kilisi-ña, nañ in oc whê sa bu kên gauc mac. Ma in oc êndôhôn mac êñkuc mêtê nañ aö gam, ma yom nañ aö daun kadôhôn tèn gôlôwac dabun yêc gameñ hon.

¹⁸ Mac nem lau ñatô sêtoc dau sa kêlêc ma sêpu aö ti anen yom, ñahu bu ñac gauc gêm bu aö oc watên mac waloc dom.

¹⁹ Tigen Pômdau bu lic ñayham, dec ñasawa saun en aö oc waloc. Ma aö oc wakip lau nañ sêtoc dau sa, nañ si yom ñahu sa. Ma gên dan whiñ, nañ oc wañyalê ñaclai bocke dec puc ñac dôn.

²⁰ Bu lau nañ Anötö gêm gôlin ñac, nañ sêsôm yom ñambwa dom, magoc Anötö ndê ñaclai puc ñac si yom dôn.

²¹ Bocké? Mac atac whiñ bu aö waloc ma wamatôc mac tôm damba nañ hi in ndê balêkoc ña sô, me mac atac whiñ bu aö waloc ma wañkuc mêtê atac whiñ-ña ti lèn yom malô-ña?

5

Yom pi ñgac mockain-ña

¹ Lau daêsam sêngô ñawaê pi ñgac mockain-ña dan nañ mbo mac nem gôlôwac dabun ñalôm. Yac

gauc gêm bu lau sambuc sêkôm mêtê sac, magoc ñac oc sêkôm mêtê sac sambuc gitôm ñgac dinan kôm, nan dom. In gêm awhê nan in damba gêm mun su.

² Bocke? Mac atoc daôm sa ma alic mêtê dau ñayham, a? Oc tôm bu in ndê mêtê kôm mac nem ñalôm ñawapac ma mayam daôm atu, e atin in su yêc gôlôwac dabun ñalôm. Magoc tu sake-nga mac akôm dom?

³ Kwahic dec aô gambo ahê mac, magoc anen ñalôm sambuc yêc whin mac. Ma aô gauc gêm lên tamatôc ñgac dau-nga gwanan su, gitôm aô daun gambo gawhin mac ma yac tamatôc in.

⁴ Tu yac nen Pômdau Yisu ndê ñaê-nga, aô wasôm têñ mac bu akac daôm sa ma amatôc giso dau. Anyalê bu Pômdau Yisu ndê ñac lai yêc mac, ma anen ñalôm sambuc yêc whin mac bocdinan.

⁵ Atin ñgac dau su yêc gôlôwac dabun ñalôm, ma akên in mbu sip Sadañ ndê gôlin ñapu. Nalên dinan dec mboe in oc nem dau kwi ma hu ndê mêtê ñalôm akwa-nga sin. Ma bocdinan dec têñ Pômdau ndê bêc êmatôc lau-nga, in ndê gatu oc ninja dom.

⁶ Mac atoc daôm sa yham dom. Gauc nem yist. Mac anyalê su bu yist ñagec oc êñsôwec malô-malô yêc bolom ñalôm e nem bolom sambuc ahuc. Ma mêtê sac gitôm bu êñsôwec yêc gôlôwac dabun ñalôm gitôm yist.

⁷ Tu dinan-nga dec atin ñgac mockain-nga dinan su yêc gôlôwac dabun ñalôm, bu in ndê mêtê ñalôm akwa-nga gitôm yist. Ma bocdinan dec mac oc ambo atôm bolom wakuc yist mbasi-nga. Bu Kilisi, nan sic ndu gitôm Domba †Pasowa-nga, nan kêgaho mac su yêc lên ñalôm akwa-nga, dec mac ati lau

wakuc su.

⁸ Bocdinaŋ dec atec yist akwa naŋ ŋahu sip mêtê sac, tòm lau Israel-ŋga naŋ sêkôc yist hoŋ su yêc ŋac si andu têtŋ ndoc Pasowa-ŋga. Ma asa nem lêtŋ tiwakuc, tu bu andi atôm bolom yist mba-ŋga, naŋ ŋahu hêganôŋ lêtŋ ŋawasi ma lêtŋ yom ŋandô-ŋga.

⁹ Aö gato bapia daŋ têtŋ mac muŋ su, ma gasôm têtŋ mac bu andic ahê lau mockaiŋ-ŋga.

¹⁰ Aö gato yom dau hêganôŋ lau sambuc dom. Aö gato hêganôŋ lau naŋ sêmbo gôlôwac dabuŋ ŋalôm, naŋ sêkôm sac. Ŋahu bu lau sambuc si lêtŋ mockaiŋ-ŋga me mêtê sêneŋ gêtŋ ŋawahô-ŋga me mêtê sêŋsau lau tu sêŋgaho ŋac si gêtŋ-ŋga me lêtŋ sênem akiŋ gwam-ŋga, naŋ gêm nom ahuc sambuc. Ma aö bu wasôm têtŋ mac bu andic ahê lau sambuc ti ŋac si lêtŋ sac, dec oc tòm dom bu mac atap ŋasawa daŋ sa yêc nom tu ambo-ŋga.

¹¹ Aö gasôm têtŋ mac bu andic ahê ŋamalac bocke naŋ sam dau bu ŋamalac kêŋ whiŋ-ŋga, magoc kôm sac ŋapaŋ. Mac nem asa naŋ kôm mêtê mockaiŋ-ŋga, me gêtŋ gêtŋ ŋawahô, me gêm akiŋ gwam, me sôm yom sac-sac, me nôm gêtŋ e kêŋiŋ iŋ, me kêsau lau bu êŋgaho ŋac si gêtŋ, naŋ andic ahê iŋ ŋapep. Andöc awhiŋ iŋ, ma aneŋ gêtŋ awhiŋ iŋ dom.

¹²⁻¹³ Gwelenŋ tamatôc lau naŋ sêmbo gôlôwac dabuŋ ŋalôm dom, naŋ gic waê yac dom. Anötö dau oc êmatôc ŋac. Magoc lau naŋ sêmbo gôlôwac dabuŋ ŋalôm bu sêkôm sac, dec iŋ yac neŋ gwelenŋ bu tamatôc ŋac. Akôm tòm yom naŋ sêto yêc, naŋ sôm bu:

Ŋamalac bocke naŋ kôm sac, naŋ atinŋ iŋ su yêc
mac nem toŋ ŋalôm. *[Diut 17:7]*

6

Lêñ tamatôc ñawapac-ñga

¹ Tu sake-ñga dec mac akêñ lau sêkêñ whiñ-ñga si yom têtñ ñgac êmatôc yom-ñga nañ kêtñ whiñ dom, bu êmatôc? Yom dañ bu yêc ñamalac sêkêñ whiñ-ñga lu ñasawa, dec mac daôm amasañ.

² Anjalê tidôn! Têtñ ndoc Yisu mbu meñ, nañ Anötö oc kêtñ gwelenñ sip i ñ ndê lau dabuñ amba, bu sêmatôc lau nom-ñga. Gwelenñ dau inñ gwelenñ atu andô, ma yom nañ kwahic dec yêc lau sêkêñ whiñ-ñga ñasawa, nañ gitôm gêtñ sauñ. Boc-dinañ dec mac atôm bu amatôc.

³ Ma anjalê gêtñ atu dañ tiyham. Yac oc tamatôc añela sac si yom whiñ. Bocdinañ têtñ têtñ kwahic dec-ñga yac datôm bu tamatôc yom bocke nañ yêc yac ñasawa.

⁴ Tu dinañ-ñga dec yom bu yêc mac nem ñamalac lu ñasawa, nañ tu sake-ñga mac akêñ têtñ lau nañ si ñaê mba yêc gôlôwac dabuñ ñalôm, bu sêmatôc? Mac daôm atôm dom bu amatôc, a?

⁵ Aô gato y om dindéc bu wakôm mac mayam daôm. Bocke? Yêc mac nem gôlôwac dabuñ ñalôm, ñamalac tiguaç nañ gitôm bu êmatôc lau sêkêñ whiñ-ñga si yom, nañ dañ mbo dom, a?

⁶⁻⁷ Bocke dec mac nem dañ kêtñ inñ ndê asidôwa dañ kalhac lau nañ sêkêñ whiñ dom, nañ añgô-ñga, tu bu sêmatôc inñlu si yom-ñga? Tu mac akôm bocdinañ-ñga dec ku mac nem lêtñ añkuc Kilisi-ñga dulu su. Mac nem lau sêkêñ whiñ-ñga ñatô bu sêkôm sac têtñ mac, me sêsôm yom tasanñ bu sêtñgaho mac nem gêtñ ñatô su, dec wasôm têtñ mac bu ahu gêtñ dau sinñ têtñ ñac ma ahôc ñawapac dau!

⁸ Magoc mac akôm dom. Mac daôm akôm sac t êñ daôm, ma aŋgaho nem asidôwai si gêñ su.

Lau sac oc sêtap undambê sa dom

⁹ Aŋgô ma aŋyalê! Lau nañ sêkôm mêtê sac, nañ si danj oc wêkaiñ ndê mala yêc Anötö ndê gameñ undambê-ŋga dom. Akôc gauc ñapep ma aŋsau daôm dom! Lau nañ sêkôm mêtê mockaiñ-ŋga ñalêñ tidau-tidau nañ so pwac nañ Anötö kêmatiñ tidôn tu lauwê ma launçac sênem dandi-ŋga, launçac nañ sêkêñ dau têtñ launçac ñatô, lau nañ sem akiñ gwam,

¹⁰ lau kañ, lau nañ señ gêñ ñawahô, lau nañ sênôm gêñ e kêñiñ ñac, lau nañ sêsôm yom sac-sac, lau nañ sêñsau lau tu sêñgaho ñac si gêñ-ŋga, lau kaiñ dinañ si danj oc wêkaiñ ndê mala yêc Anötö ndê gameñ dom.

¹¹ Muñ-ŋga mac nem lau ñatô sêsa lêñ sac bocdinañ. Tigeñ kwahic dec yac neñ Anötö kôm gwelen pi mac ña iñ ndê Ñalau Dabuñ. Iñ kêgwasin mac nem sac hoñ su giñga, ma kôm mac ati lau dabuñ ma lau gitêñ tu Pômdau Yisu Kilisi ndê ñaê-ŋga.

¹² Mac nem lau ñatô sêsôm yom bocdec bu, “Gêñ hoñ gitôm bu yac dakôm. Yao danj yêc dom.” Magoc aö wasôm têtñ mac bu gêñ hoñ oc nem yac sa dom. Yomandô, gêñ hoñ gitôm bu yac dakôm, ma yao danj yêc dom. Magoc aö dauñ gatec bu gêñ danj nem gôlinj aö.

¹³ Ma mac nem lau ñatô sêsôm bu, “Anötö kêñ gêñ daneñ-ŋga tu ñatac-ŋga, ma kêñ ñatac tu gêñ daneñ-ŋga-ŋga. Magoc iñ oc señ gêñ daneñ-ŋga ma ñatac lu-lu su sêniñga.” Tu ñac si yom dinañ-ŋga dec sêlic si ñamlic tôm gêñ ñambwa-ŋga ma sêkêñ

si ñamlic bambalin tu sêkôm mêtê mockain-nga tidau-tidau. Magoc anğô! Anötö kêmasañ yac ne ñ ñamlic tu danem akin Pômdau-nga, ma Pômdau ndê gwelen nem yac si-nga gic waê yac gatun tigen dom, magoc gic waê yac neñ ñamlic whin.

14 Anötö ndê ñaclai un Pômdau sa akên lau batê-nga, ma oc un yac sa ti ñamlic sambuc bocdinañ.

15 Anğô su nan! Mac nem akên whin pin mac dôn am damin Kilisi, dec kôm mac nem ñamlic ti in ndê ñandô ñadañga dañ. Mac anyalê yom dindec, me mba? Ma bocke dec mac alic ñayham bu akôc Kilisi ndê ñandô ñadañga ma asap pi awhê mockain-nga? Lên dau sac sambuc!

16 Ngac dañ bu yêc whin awhê mockain-nga dañ, nan inlu sêti ñamlic tigen. Mac anyalê, me mba? Gauc nem Anötö ndê yom nan sêto yêc bocdec bu: Inlu oc sêti gên tigen. *[Gen 2:24]*

17 Magoc asa nan sap Pômdau dôn, nan Nalau pin inlu dôn sêti gên tigen.

18 Bocdinañ alhõ su yêc mêtê mockain-nga. Bu asa nan kôm mêtê mockain-nga nan kôm mêtê sac tên dau ñamlic, bu mêtê dau kêyain in ndê ñamlic hôc gêlêc mêtê sac ñatô nan in bu kôm.

19 Anğô! Anötö kêñ Nalau Dabun tên mac lau tigen-tigen ma in mbo nem ñalôm, dec mac nem ñamlic gitôm Nalau ndê lôm dabun. Anyalê, me mba? Mac ñadau daôm dom.

20 Mba! Anötö gêmlihi mac su ati in ndê, ña ñaôli atu. Tu dinañ-nga dec ayob nem ñamlic ñapep, tu bu gên hon nan mac akôm, nan oc po Anötö ndê waê sa.

7

Yom pi lauwê ti laungac sênem dandi-nga

¹ Kwahic dec aô bu waô yom ñatô nan mac ato sip nem bapia. Mac ato yom pi mac nem gauc bocdec bu, lauwê ma ñgac bu sênem dau dom, dec oc ñayham.

² Gauc dinañ in ñayham, magoc lêñ mockain-nga kêsôwec tiatu yêc nom, ma tu dinañ-nga dec wasôm têñ mac bu in lêñ ñayham kêlêc bu lauwê sênem ñgac sa, ma laungac sênem awhê sa.

³ Ma ñgac dañ êñgamin dau têñ ndê awhê dom, ma awhê êñgamin dau têñ ndê akwen dom.

⁴ Bu awhê dañ ti ñadau dau ndê ñamlic tawasê dom, in nakwen ti ñadau whin. Ma ñgac dañ ti ñadau dau ndê ñamlic tawasê dom, in ndê awhê ti ñadau whin.

⁵ Bocdinañ awhê lu ñgac sêñgamin dau têñ dandi dom, mboe inlu si dañ ndê ñalôm kac in e Sadañ êntôm in bu kôm mêtê mockain-nga. Inlu bu si ñalôm pitigen bu sêmbo ahê dau ñasawa saun bu sênem dabun dau tu sêten mbec-nga, dec oc tôm. Magoc têñ t êm dau pacndê, nan sêmbo sêwhin dau tiyham.

⁶ Aô gauc gêm bu in lêñ ñayham bu lauwê ma ñgac sênem dau, ma tu dinañ-nga dec gawhê yom dau sa têñ mac. Magoc aô gato tu bu wandic yomsu lauwê ma ñgac hon bu sênem dau-nga lec dom.

⁷ Aô tac whin bu lau hon sêmbo sêtôm aô dec gambo. Tigen Anötö gic sam in ndê mwasiñ tidau-tidau têñ ñamalac tigen-tigen tôm gi. Yac hon dawêkain mwasiñ kain tigen dom.

⁸ Aö bu wasôm yom pi launḡac sawa, ma lauwhê sawa. Nac bu sênem awhê me ḡnac wakuc dom, ma sêmbô sêtôm aö gambo, dec oc ḡayham.

⁹ Magoc ḡac bu sêḡsahê bu sêtôm dom bu sêtimêtê dau tu lêḡ ḡalôm ḡagalac-ḡga, naḡ inḡ oc ḡayham hôc ḡêlêc bu lauwhê sawa sênem ḡnac sa, ma launḡac sawa sênem awhê sa tiyham.

¹⁰ Aö bu wakêḡ ḡagôlinḡ danḡ têḡ lauwhê ma ḡnac naḡ sem dau sa su. Aö taḡwasêḡ neḡ yom dom, bu Pômdau dau kêḡ ḡagôlinḡ bocdec bu, awhê danḡ hu ndê akweḡ sinḡ dom.

¹¹ Magoc inḡ bu hu ndê akweḡ sinḡ, naḡ nem ḡnac wakuc dom. Inḡ êḡsahê bu êmasaḡ yom whinḡ nakweḡ tiyham ma mbu ndi mbo whinḡ inḡ. Bu mba, naḡ inḡ mbo tawasê. Ma ḡagôlinḡ tigenḡ dinaḡ ḡic waê launḡac bocdinaḡ. ḡnac danḡ hu ndê awhê sinḡ dom.

¹² Ma aö bu wasôm yom têḡ mac honḡ, pi awhê lu ḡnac naḡ sem dau sa su, magoc danḡ kêḡ whinḡ, ma danḡ kêḡ whinḡ dom. Yom dindec Pômdau sôm têḡ aö dom, aö dauḡ gauc ḡêm bu inḡ lêḡ ḡayham dec bu wasôm têḡ mac. ḡnac kêḡ whinḡ-ḡga danḡ bu ndê awhê kêḡ whinḡ dom, magoc awhê dau tac whinḡ bu mbo whinḡ inḡ, naḡ ḡnac dau hu inḡ sinḡ dom.

¹³ Ma awhê kêḡ whinḡ-ḡga danḡ bu nakweḡ kêḡ whinḡ dom, magoc ḡnac dau tac whinḡ bu mbo whinḡ inḡ, naḡ awhê dau hu nakweḡ sinḡ dom.

¹⁴ Nahu bu Anötö oc lic inḡlu si sem dau-ḡga bu ḡadômbwi tu inḡlu si danḡ kêḡ whinḡ dom-ḡga lec dom. Mba. Tu awhê me ḡnac naḡ kêḡ whinḡ-ḡga, dec Anötö ḡêlic inḡlu si sem dau-ḡga dinaḡ tôm ḡêḡ dabuḡ. Bu bocdinaḡ dom, dec Anötö oc lic balêkoc

nañ inlu sêkwê asê bu ñadômbwi. Magoc mba. In gêlic inlu si balêkoc bu dabuñ tu in nañ kêñ whiñ-ñga.

15-16 Bocdinañ in lêtñ ñayham bu lauwhê ma ñgac kaiñ dinañ nañ sem dau su, nañ sêhu dandi siñ dom. Bu mboe am awhê nañ kêñ whiñ, oc ti lêtñ bu am nem akweñ nañ kêñ whiñ dom, nañ oc tap Anötö ndê mwasiñ nem in si-ñga sa. Ma am ñgac nañ kêñ whiñ, mboe am oc ti lêtñ bu Anötö nem am nem awhê nañ kêñ whiñ dom, nañ si. Asa kêyalê? Magoc yom dau in bu ti balan ñanga tu lauwhê ma launçac sêhu dandi siñ-ñga dom. Bu Anötö kêgalêm yac sa bu dambo ti yom malô. Bocdinañ ñgac nañ kêñ whiñ dom bu tac whiñ bu hu ndê awhê kêñ whiñ-ñga siñ, nañ dec alhac in ahuc dom. Ma awhê nañ kêñ whiñ dom, nañ bocdinañ.

Anötö ndê galem, ma lêtñ dambo-ñga

17 Aö gakêñ ñagôliñ dañ têtñ gôlôwac dabuñ hoñ nañ gam mêtê ñac su, nañ hêganôn yom hoñ dindec, ma ñagôliñ dau bocdec bu. Pômdau dau kêmasañ ñamalac si lêtñ têtñtêtñ su, ma ñalêtñ bocke nañ ñamalac dañ mbo têtñ ndoc Anötö ndê galem tap in sa, nañ in gauc nem bu hu siñ dom.

18 Anötö bu êñgalêm ñgac nañ sêsê in ndê ñamlic ñatô su kêkuc lau Israel-ñga si pwac, nañ sa, nañ goc sêc gêtñ dau ahuc dom. In bu êñgalêm ñgac dañ sa nañ sêsê in su dom, nañ goc sêsê in dom.

19 Yac bu dasê launçac me dasê ñac dom, in gêtñ ñandô dom. Gêtñ ñandô dau bocdec bu, yac dañañ wambu Anötö ndê yom hoñ mañ.

20 Ñalêtñ bocke nañ lau sêmbo têtñ ndoc Anötö kêgalêm ñac sa, nañ sêsap dôñ ñapañ.

21 Am bu awhê me ngac akiñ nambwa têtêm Anötö ndê galem tap am sa, nañ goc hêgo daôm dom. Am bu tap lêt dan sa bu nem nãdau êngapwêc am su, dec oc tòm, magoc in gêt atu dom.

22 Bu awhê me ngac akiñ nambwa nañ Pômdau kêgalêm in sa, nañ Pômdau kêgapwêc in su yêc sakin mêtê sac-nga. Ma am asa nañ gêm akiñ lau dan dom, magoc Pômdau kêgalêm am sa, nañ goc anjalê napep bu kwahic dec am ti Kilisi ndê awhê me ngac akiñ.

23 Kilisi gêmlihi mac su ña ñaôli atu. Tu dinañ-nga dec anjalê napep bu ñamalac nom-nga dan ti mac nem nãdau ñandô dom.

24 O asidôwai hac! Nalêt bocke nañ mac ambo têt ndoc Anötö ndê galem tap mac sa, nañ gauc nem bu akôm ñapañ ambo Anötö anğô-nga.

Yom pi lau nañ sem dandi sa su dom

25 Aö bu wasôm yom pi lau wakuc nañ sem dau sa su dom. Pômdau kêt ñagôlin dan têt aö hêganôn ñac dom. Magoc in ndê mwasin puc aö dôn, dec akêt whin aö ma akôc yom dindec sa.

26 Tu lau sêkêt kisa ña nga têt yac lau dakêt whin-nga têt têt dindec-nga, dec aö gauc gêm lêt ñayham bocdec bu, lau nañ sem dau sa su dom, nañ sêmbo bocdinañ.

27 Am ngac nañ sêhoc am nem yom asê su bu nem awhê dan, nañ êmsalê lêt tu hu yom dau sin-nga dom. Ma am ngac nañ sêhoc am nem yom asê su dom, nañ êmsalê awhê tu nem-nga dom.

28 Magoc am asa nañ gauc gêm tidôn bu nem awhê me ngac, nañ am kôm sac dom. Tigeñ lau nañ sem dau sa su, nañ oc sêhoc ñawapac yêc nom

dindec, ma aö gatec bu mac atap ñawapac sa atôm ñac, dec gasôm yom dinañ.

Danem akiñ Pômdau ti neñ ñalôm sambuc

²⁹ O asidôwai, aö wasôm têtñ mac bu têtñ tiapê su. Bocdinañ têtñ kwahic dec ma ndi, nañ ambo bocdec. Lauñgac nañ sem awhê sa su, nañ sêmbo tôm sem awhê sa dom.

³⁰ Lau nañ sêtañ danñgibo, nañ sêmbo tôm sêtañ dom. Lau nañ atac ñayham, nañ sêmbo tôm ñac atac ñayham dom. Lau nañ semlhi gêtñ, nañ sêmbo tôm ñac si wapa mbasi.

³¹ Ma lau nañ sêkôm gwelenñ pi gêtñ nom-ñga, nañ gauc nem gêtñ dau êñlêc dom. Yom dau ñahu bu nom kwahic dec-ñga oc yêc ñapañ dom, oc ñinga.*

³² Aö tac whiñ bu mac ayêm daôm su tu gêtñ nom-ñga-ñga lec dom. Lauñgac nañ sem awhê sa su dom, nañ oc sêyêm dau su tu sêkôm Pômdau ndê gwelenñ-ñga, ma bu sêkôm gêtñ nañ gic Pômdau tandô ñayham.

³³ Magoc lauñgac nañ sem awhê sa su, nañ oc sêyêm dau su tu gêtñ nom-ñga-ñga, tu bu sêkôm ñac si lauwhêi atac ñayham sa.

³⁴ Bocdinañ sêyêm dau su tu Pômdau tigenñ-ñga dom, magoc sêkôm ti ñalôm lu-lu. Ñalêñ tigenñ,

* **7:31:** Yom nañ Pol sôm yêc ñabatiñ 29-31 nañ ñahu bocdec, yac neñ ñahu andô dambo nom-ñga nañ sip gêtñ nom-ñga dom. In sôm bu lauñgac nañ sem awhê sa su, nañ sêmbo tôm sem awhê sa dom. Magoc in sôm tu bu lauñgac sêpu si awhêi me sêpuc dômbwê ñac lec dom. Mba. In bu whê sa bu danem dauñ, me datañ danñgibo, me dambo ti atac ñayham, me datidulu gêtñ, me dakôm gwelenñ pi gêtñ nom-ñga, nañ ti yac neñ ñahu andô dambo nom-ñga dom. Dakêñ whiñ Pômdau ti danem akiñ in, nañ in gêtñ atu.

lauwhê akiñ me lauwhê bocke nañ sem ñgac sa dom, nañ oc sêyêm dau su tu sêkôm Pômdau ndê gwelen-ñga, ma pi lêñ bu sêtimêtê dau si ñamlic ti gatu ñapep. Magoc lauwhê nañ sem ñgac sa su, nañ sêyêm dau su tu gêñ nom-ñga-ñga tu bu sêkôm nakwenji atac ñayham sa.

³⁵ Aö gato yom dindec tu bu wanğwiniñ mac-ñga dom. Aö gato bu wanem mac sa, ma bu mac asa lêñ ñayham ma anem akiñ Pômdau ti nem ñalôm sambuc, ma ahê gauc pi gêñ nom-ñga êñlêc dom.

Yom ñatô pi lauwhê ma launğac si lêñ

³⁶ Aö bu wasôm yom pi ñgac nañ sêhoc inļu awhê akiñ dañ si yom asê bu sênem dau, magoc inļu sem dau sa su dom. Ñgac dau bu ndê ñalôm kac in ma tac whiñ ñandô bu nem awhê dau, dec in kôm sac dom. Akêñ inļu sênem dau.

³⁷ Magoc ñgac dau bu gauc nem tidôñ yêc in ndê ñalôm bu nem in ndê awhê akiñ dinañ dom, nañ in kôm gêñ ñayham. In bu nditôm bu nem gôliñ dau ndê lêñ, dec kôm tôm in ndê ñalôm gauc gêm tidôñ. Ñamalac dañ gitôm dom bu kac in.

³⁸ Bocdinañ ñgac nañ gêm ndê awhê sa, nañ kôm mêtê ñayham, ma in nañ gêm awhê sa dom, nañ kôm mêtê ñayham hóc gêlêc su.

³⁹ Awhê nañ gêm ñgac sa su, nañ inļu si yom sênem dau-ñga piñ inļu dôn e in nakwen mbac ndu. In nakwen bu mbac ndu, ma awhê dau tac whiñ bu nem ñgac dañ tiyham, nañ yao mbasi. Oc tôm bu in nem ñgac kêñ whiñ-ñga bocke nañ in tac whiñ, magoc gitôm dom bu nem ñgac nañ kêñ whiñ Pômdau dom.

40 Magoc aö dauḡ gauc gêm bu awhê tuc dau bu mbo tawasê, dec oc êmwasiḡ iḡ êḡlêc. Aö dauḡ neḡ gauc dinaḡ, ma Anötö ndê ḡalau, naḡ mac asôm bu gêm gôliḡ mac, naḡ mbo aneḡ ḡalôm whiḡ, dec puc aneḡ gauc dôḡ.

8

Gêḡ daneḡ-ḡga naḡ lau sêkêḡ ti da têḡ anötöi gwam

¹ Mac ato yom ḡatô pi gêḡ daneḡ-ḡga naḡ lau sêkêḡ ti da têḡ anötöi gwam.* Tôḡ mac asôm, yac hoḡ datap gauc sa su. Magoc yac bu dakôm gêḡ naḡ taḡyalê bu yao daḡ kalhac yac ahuc bu dakôm-ḡga dom, dec taḡkuc lêḡ dapo dauḡ sa-ḡga. Yac bu dakôm gêḡ naḡ tôc asê bu yac atac whiḡ neḡ asidôwai, ma bu dapo ḡac sa, naḡ iḡ lêḡ ḡayham kêlêc.

² Asa naḡ toc dau sa bu iḡ ḡamalac ti gauc atu, naḡ tap sa gitôm su dom.

³ Magoc asa naḡ tac whiḡ Anötö, naḡ Anötö kêyalê iḡ.

⁴ Yom dinaḡ bu whê yom dec kwahic aö bu wasôm pi gêḡ daneḡ-ḡga naḡ sêkêḡ ti da têḡ gwam, naḡ sa. Yac taḡyalê bu Anötö ḡandô tigeḡ dec mbo, ma gwam iḡ gêḡ ḡambwa nom-ḡga.

⁵ Lau naḡ sêkêḡ whiḡ dom, naḡ sêtoc gêḡ daêsam sa ti ḡac si anötöi ma pômduai. ḡac sem akiḡ gêḡ

* **8:1:** Têḡ têm dinaḡ lau daêsam sem akiḡ anötöi gwam. ḡac sêkêḡ wata ti da pi alta gwam-ḡga, ma tiḡambu seḡ ḡatô, ma ḡatô sêkêḡ sa maket. Lau Korin-ḡga ḡatô gauc gêm bu yao daḡ kalhac ḡac ahuc tu sêneḡ wata kaiḡ dinaḡ dom, ma sêto yom têḡ Pol ma sêndac iḡ pi gêḡ dau.

nom-nga ma gêñ undambê-nga ma sêsam bu ñac si anötöi.

⁶ Magoc yac lau dakêñ whiñ-nga datoc Anötö tigen sa. In Daman nan kên gêñ hon, ma yac dati in ndê. Ma Pômdau tigen mbo. In Yisu Kilisi, nan Anötö kên gêñ hon ña in, ma ti yac neñ ñahu dambo tanli-nga.

⁷ Tigen lau hon si gauc sa ñapep pi gêñ nan lau sêkên ti da têt gwam, nan dom. Lau sêkên whiñ-nga ñatô mun-nga sem akiñ gwam, ma sêhu siñ su, magoc lêt dau k alhac ñac si gauc ñapan. Bocdinañ kwahic dec ñac bu sêneñ gêñ daneñ-nga nan lau sêkên ti da têt gwam, dec oc kôm ñac si ñalôm lu-lu bu mboe sêkôm sac.

⁸ Magoc Anötö oc lic yac ñayham me sac tu gêñ daneñ-nga-nga dom. Yac bu daneñ me daneñ dom, nan lêt dan hóc gêlêc dan su dom.

⁹ Magoc ayob ñapep bu gêñ nan mac alic tôm bu akôm, nan kôm ñamalac dan, nan ndê ñalôm lu-lu pi gêñ dau, nan ndê kên whiñ tisac dom.

¹⁰ Am asa nan kêyalê bu yao dan kalhac am ahuc dom bu neñ gêñ ndöc lôm sênem akiñ gwam-nga, nan ñgô. Ñamalac kên whiñ-nga dan nan ndê gauc sa ñapep pi gêñ dau dom, nan bu lic am neñ gêñ ndöc dindê, dec oc mboe in ndê ñalôm oc pêt dön bu neñ gêñ nan sêkên ti da têt gwam, nan whiñ am.

¹¹⁻¹² Am nem gauc sa ñapep, magoc am nem lêt dinañ in s o. Ñahu bu mboe tiñambu ñamalac dinañ oc ñalôm ñawapac pi gêñ nan in kôm e kôm in ndê kên whiñ tisac ma sa lêt niñga-nga. Kilisi mbac ndu su bu nem am nem asidôwa dinañ, nan ndê gauc babalê, nan si-nga, ma bocdinañ gêñ nan am kôm têt in, nan tôm am kôm sac têt Kilisi dau.

13 Bocdinaŋ aö neŋ lêŋ waneŋ wata-ŋga bu wê aneŋ asidôwa daŋ sa seŋ sac-ŋga, dec waneŋ gêŋ dau tiyham dom andô. Nahu bu aö gatec bu wakôm aneŋ asidôwa daŋ ndê kêŋ whiŋ tisac.

9

Pol whê dau sa bu aposel ŋandô

¹ Aö gambo ŋamalac daŋ ŋapu dom, ma aö aposel ŋandô. Aö galic yac neŋ Pômdau Yisu pi tanôŋ solop. Ma mac daôm ati lau akêŋ whiŋ-ŋga, tu mêté naŋ aö gam pi Pômdau têŋ mac-ŋga. Yom honŋ dinaŋ iŋ yom ŋandô, me?

² Lau ŋatô sêlic aö gitôm aposel si daŋ dom, ma mac bocke? Oc tôm dom bu mac andac batam aö. Nahu bu mac ati lau akêŋ whiŋ Kilisi-ŋga tu ŋawaê ŋayham naŋ aö gahoc asê têŋ mac-ŋga, ma gêŋ dau tôc asê bu aö Pômdau ndê aposel ŋandô.

³ Mac lau naŋ andac batam aö bu aposel ŋandô me mba, naŋ aŋgô!

⁴ Aö ti lau naŋ sêkôm gwelenŋ ŋawaê ŋayham-ŋga sêwhiŋ aö, naŋ bu taŋkwê lau bu sêpuc yac dôŋ ŋa gêŋ aneŋ ti anôm-ŋga ô yac mba gwelenŋ, dec yac akôm so, a?

⁵⁻⁶ Mac gauc gêm bocke? Iŋ solop bu alu Banabas taŋwasêŋ anem gwelenŋ tu akôm kwanŋ dauŋ-ŋga, magoc aposel ŋatô takwê lau tu sênem ŋac sa-ŋga, a? Ma yac bu akôc mba lauwhêi naŋ sêkêŋ whiŋ sêŋsêlêŋ sêwhiŋ yac, ma taŋkwê lau bu sêkêŋ gêŋ sêpuc ŋac dôŋ sêwhiŋ yac-ŋga, naŋ iŋ lêŋ so, a? Mac aŋyalê su bu Pita ma lau aposel ŋatô ma Pômdau ndê asii sêkôc si lauwhêi sêŋsêlêŋ sêwhiŋ ŋac.

⁷ Ngac siŋ-ŋga bocke gêmli dau tu gwelen ndic siŋ-ŋga? Ma ŋamalac naŋ sô gêŋ ŋawhê, naŋ in lêŋ solop bu in neŋ gêŋ dau ŋa-ŋandô, me? Ma ŋamalac naŋ yob domba ma naniŋ, naŋ bu nôŋ su ŋagec ô in ndê gwelen dinaŋ, naŋ so me?

⁸ Aô gasôm yom pi ŋamalac si lêŋ gwelen-ŋga ŋatô bu wawhê gêŋ dau sa. Magoc Anötö ndê yom whê gêŋ dau sa whiŋ.

⁹ Bu yomsu daŋ naŋ Moses to, naŋ sôm bu:

Têŋ ndoc mac akêŋ makao sêkôm gwelen bolom-ŋga, naŋ asô ŋac tôkwa ahuc dom. Sêneŋ bolom ŋatô ô ŋac si gwelen. *[Diut 25:4]*

Mac gauc gêm bu Anötö kêŋ yom dau gic waê makao ŋambwa, a?

¹⁰ In kêŋ yom dau gic yac ŋamalac ŋawaê solop. Yomandô! Moses to yom dau tu yac-ŋga. Bu ŋamalac naŋ sô gêŋ ŋawhê, ma ŋamalac naŋ gic gêŋ ŋandô sa, naŋ lu-lu sêkêŋ bata bu oc sêneŋ gêŋ ŋandô.

¹¹ Ma yac lau aposel bocdinaŋ. Yac akôm gwelen tu mac gatôm-ŋga, tôŋ lau naŋ sêsô gêŋ ŋawhê sip ôŋ. Ma yac bu taŋkwê gêŋ ŋatô yêc mac tu bu puc yac dôŋ-ŋga, dec tu sake-ŋga mac alic sac?

¹² Lau ŋatô sêkôm gwelen têŋ mac ma sêkac mac bu akêŋ gêŋ puc ŋac dôŋ-ŋga. Ma yac atôm bu andac mac bu anem yac sa hôc gêlêc su. Yac atôm, magoc yac akôm dom. Mba! Yac atec bu gêŋ daŋ lhac yac mba gwelen pi Kilisi ndê ŋawaê ŋayham ahuc. Ma tu dinaŋ-ŋga dec yac alic ŋayham bu ahôc ŋawapac daêsam.

¹³ Ma gêŋ daŋ tiyham. Mac aŋyalê su bu lau naŋ sem akiŋ Anötö sêmbo lôŋ dabuŋ, naŋ sêtap gêŋ

danen-nga sa yêc gêñ danen-nga nan lau sêkêñ ti da pi alta yêc lôm dabun.

14 Ma Pômdau dau gic atu yom kain tigen, ma tôc asê bu in lêt solop bu lau nan sêhoc ñawaê ñayham asê, nan sêtap gêñ puc ñac dôñ-nga sa yêc lau nan sêkôc ñawaê dau sa.

15 Bocdinan, aö gatôm bu wakêñ batan gêñ puc aö dôñ-nga, magoc gakôm dom. Ma yom nan kwahic d ec aö gato, nan gato tu bu wandac mac bu anem aö sa-nga lec dom. Mba! Aö bu gêñ yô aö e wambac ndu, nan ñayham hóc gêlêc bu wandac gêñ puc aö dôñ-nga yêc lau ñapan, e sêtec bu sêngô ñawaê ñayham. Aö gapo daun sa tu anen lêt dinan-nga, ma aö bu wasa lêt dan dau-nga, dec anen ñahu wapo daun sa-nga oc mbasi.

16 Magoc aö oc wapo daun waên sa tu gwelen ñawaê ñayham-nga dom, ñahu bu Anötö kên gwelen dau sip aö aman, dec anen ñalôm kac aö ñandô bu wakôm. Ma aö bu wahoc ñawaê ñayham asê dom, dec oc kên wapac aö sac sambuc.

17 Bu aö gakôm gwelen dau tu aö daun gauc gêm tidôn bu wakôm-nga lec dom. Bu bocdinan dec oc tôm bu tankwê bu wakôc ñaôli ô anen gwelen. Magoc aö gakôm gwelen dau tu Anötö-nga, bu in dau kêyalin aö sa gac waê gwelen dau.

18 Bocdinan aö oc tankwê ñaôli bocke? Gêñ nan yac lau ahen-nga atôm bu tankwê, nan aö oc wahu sin. Aö tac whin bu têt ndoc wahoc ñawaê ñayham asê têt lau, nan wakêñ têt ñac ñambwa. Lêt dinan ti anen ñaôli.

19 Bu aö gambo ñamalac dan ñapu dom, magoc aö galic ñayham bu wati lau hon si ñgac akin ñambwa,

tu bu wanşahê bu wanem lau daêsam kwi bu sêkêñ whiñ Kilisi ma sêtap Anötö ndê mwasiñ nem ñac si-ñga sa.

²⁰ Têñ ndoc nañ aö gambo gawhiñ lau Israel-ñga, nañ aö kasahê bu wambo watôm ñac si dañ, tu bu wanem ñac si daêsam kwi e sêkêñ whiñ Kilisi. Aö gambo Moses ndê yomsu dañ ñapu dom, tigenñ têtêm aö gambo gawhiñ lau nañ sêmbo yomsu ñapu, nañ aö kasahê bu wambo watôm ñac si dañ, tu bu wanem ñac si lau daêsam kwi tu Kilisi-ñga.

²¹ Ma têtêm ndoc aö gambo gawhiñ flau gamenñ apa-ñga nañ sêkôc Moses ndê yomsu sa dom, nañ kasahê bu wambo watôm ñac si dañ, tu bu wanem ñac si lau daêsam kwi tu Kilisi-ñga. (Aö gatec Anötö ndê yomsu dom, magoc aö gambo Kilisi ndê yomsu ñapu.)

²² Têñ ndoc aö gambo gawhiñ lau nañ sêkêñ whiñ gwalec, nañ aö kasahê bu wambo watôm ñac sêmbo, tu bu wanem ñac si daêsam kwi sêkêñ whiñ Kilisi.* Aö kakuc lêtêm daêsam têtêm ndoc gambo lau tidau-tidau si toñ ñalôm, ma gakôm gêtêm hoñ tu bu wanem lau ñatô kwi-ñga.

²³ Aö gakôm gêtêm hoñ dinanñ tu ñawaê ñayham-ñga, tu bu lau daêsam sêtap ña-mwasiñ sa sêwhiñ aö.

²⁴ Gauc nem lau nañ sênti tu sêhôt gêtêm dandi-

* **9:22:** Pol tôc asê tiawê bu inñ mbo yomsu ñapu dom, magoc têtêm ndoc inñ mbo whiñ lau nañ atac lu-lu pi gêtêm ñatô, dec inñ hu gêtêm nañ inñ kêtâlê bu yao mba, nañ siñ tu bu êñsôn ñac-ñga dom. Gauc nem yom nañ inñ to pi wata nañ lau sêkêñ ti da têtêm gwam yêc 1 Kor 8:1-13. Pol ndê ñalôm ñawapac tu neñ gêtêm dinanñ-ñga dom, tigenñ lau ñatô bu gauc nem yom daêsam pi gêtêm dau, dec inñ oc hu siñ têtêm inñ mbo whiñ ñac, tu bu kôm ñac si sêkêñ whiñ tisac dom-ñga.

nga. Nac honj sênti, magoc ñamalac tigenj oc hôc gêlêc ma tap ñamalac ñamata-nga ndê ñaôli sa. Asa nem lêj akêj whinj-nga atôm ñamalac nanj kêtî hôc gêlêc lau ñatô, tu bu atap nem ñaôli ñayham sa-nga.

²⁵ Lau honj nanj bu sênti, nanj sêtimêtê dau ñapep tu bu sêtap ñaôli sa-nga, magoc ñaôli dau oc yêc ñapanj dom. Yac lau dakêj whinj-nga tanti tu bu datap ñaôli yêc ñapanj-nga sa.

²⁶ Bocdinañ, aô dauñ gasa neñ lêj wanem akinj Anötö-nga gitôm ñgac nanj kêtî bambalinj, nanj dom. Ma aô gac sinj gatôm ñgac nanj kêbalinj amba ñambwa-ñambwa, nanj dom.

²⁷ Mba! Aô gac sinj ñanğa têtj ñalôm akwa bu watimêtê dauñ ma wayob dauñ neñ lêj ñapep enj. Aô bu wakôm bocdinañ dom, dec mêtê nanj aô gam têtj lau ñatô, nanj aô dauñ oc waso ñamwasinj.

10

Lau Israel si mêtê sac kêj puc yac

¹ O asidôwai. Aô atac whinj bu mac akôc gauc ñapep pi gêtj nanj tap abañi Israel-nga sa. Nac honj sêñsêlêj sêwhinj Moses sêmbo Anötö ndê dao ñapu, ma sêlom gwêc sêwhinj dau si.

² Nac sêmbo sêwhinj Moses yêc gwêc ti dao dinañ, dec gitôm sêlinj busanğu kainj danj, nanj pinj ñac honj dôñ sem daminj inj.

³ Nac honj señ gêtj danen-nga kainj tigenj, nanj Anötö kêj ña inj ndê ñaclai atu.

⁴ Ma ñac honj sênôm bu kainj tigenj nanj Anötö ndê ñaclai kêj sa akêj hoc. Hoc dinañ inj Kilisi dau, nanj kêsêlêj whinj ñac têtj ndoc sêmbo gameñ sawa.

⁵ Anğô napep! Lau dau hoŋ sêtap Anötö ndê mwasiŋ sa, tigenŋ ŋac si lau daêsam sêsa si lêŋ sic iŋ tandô dom, dec iŋ gic ŋac ndu yêc gameŋ sawa.

⁶ Gêŋ hoŋ dinaŋ ŋandô sa gitôm dôhônŋ bu kêŋ puc yac. Abaŋi Israel-ŋga dinaŋ si ŋalôm sap mêtê sac dôŋ ŋapaŋ, ma bocdinaŋ dayob dauŋ bu taŋkuc ŋac si lêŋ dom.

⁷ Ŋac si lau ŋatô sem akiŋ anötöi gwam têŋ têm sêmbo gameŋ sawa. Sêto yom pi ŋac, naŋ yêc bocdec bu:

Lau dau sêndöc sic bu sêneŋ ti sênôm gêŋ, ma sêtisa bu sêtê wê ma sêkôm mêtê ŋalôm ŋagalac-ŋga tidau-tidau. *[Eks*

32:6]

Bocdinaŋ ayob daôm napep bu aŋkuc ŋac si lêŋ sênem akiŋ gwam-ŋga dom.

⁸ Ma akôm mêtê mockaiŋ-ŋga tôm ŋac si lau ŋatô sêkôm, naŋ dom. Bu Anötö gic ŋac si lau 23,000 ndu têŋ bêc tigenŋ.

⁹ Ma gauc nem ŋac si lau ŋatô naŋ sêŋsahê Pômdau, ma iŋ kêŋ mboc sac sêseŋ ŋac ndu. Bocdinaŋ gauc nem bu akôm sac ma aŋsahê Pômdau dom.

¹⁰ Ma atucdiŋ tôm ŋac si lau ŋatô sêkôm, naŋ dom. Ŋac sêtucdiŋ, dec Anötö kêkiŋ aŋela seŋ lau su-ŋga gic ŋac ndu.

¹¹ Anğô su naŋ. Bêc ŋambu-ŋga meŋ kêpiŋ su. Ma gêŋ hoŋ naŋ hóc asê abaŋi, ma sêto ŋayom sa yêc, naŋ gitôm dôhônŋ bu kêŋ puc yac lau têm kwahic dec-ŋga, bu taŋkuc ŋac si lêŋ dom.

¹² Bocdinaŋ am asa naŋ gauc gêm bu am kalhac ŋaŋga, naŋ yob daôm bu pweŋ dom!

13 Lêtôm bocke nañ mac añsahê, nañ tap lau hon sa bocdinañ. In gêñ wakuc dom. Magoc Anötö oc hu mac siñ me tec mac dom. In oc yob mac bu lêtôm nañ hóc gêlêc nem licwalô su, nañ ñadañ tap mac sa dom. Magoc lêtôm bu meñ, dec in oc êmasañ lêñ bu mac alhö su yêc lêtôm dau, ma puc mac dôn bu alhac ñañga ma aku sa dom.

Sakiñ mwasiñ dabuñ-ñga ma sakiñ gwam-ñga

14 Bocdinañ aneñ lau atac whiñ-ñga, añgô! Alhö su yêc sakiñ gwam-ñga.

15 Mac lau tiguaç, ma bocdinañ añsahê aneñ yom ma alic, in yom ñandô.

16 Têñ ndoc yac daneñ mwasiñ dabuñ, nañ tam mbec laclhu wain-ñga goc danôm, ma gêñ dau piñ yac dôn tam damiñ Kilisi ndê dac. Ma têtñ ndoc yac tañ bolom mwasiñ dabuñ-ñga nañ dapô kôc-kôc, dec gêñ dau piñ yac dôn tam damiñ Kilisi ndê ñandô. Yom dindec in yom ñandô, me?

17 Yac lau daêsam tañ yêc bolom tigen, dec gêñ dau piñ yac hon dôn dati gêñ tigen.

18 Gauc nem lau Israel-ñga nañ señ gêñ daneñ-ñga nañ lau sêkêñ ti da pi alta. Lau hon nañ señ gêñ dau, nañ gêñ dau piñ ñac dôn sem damiñ alta dinañ ñadau.

19 Aö gasôm yom dau tu bu watôc asê bu gwam in gêñ ñandô lec dom, me da nañ lau sêkêñ pi alta tu sênem akiñ gwam dañ-ñga, in gêñ ñandô lec dom. Mba andô!

20 Magoc gêñ nañ lau sambuc sêkêñ ti da, nañ sêkêñ ti da têtñ Anötö dom, sêkêñ tu sênem akiñ ñalau sac-ñga. Ma aö gatec bu mac aneñ gêñ nañ oc piñ mac dôn anem damiñ ñalau sac.

21 Gitôm dom andô bu mac anôm gêñ yêc laclhu nañ piñ mac dôñ am damiñ Pômdau, ma tiñambu andi anôm yêc laclhu nañ oc piñ mac dôñ anem damiñ ñalau sac whiñ. Gitôm dom andô bu mac aneñ Pômdau ndê mwasin, ma aneñ mwasin nañ lau sen tu sêtoc ñalau sac sa-ñga whiñ.

22 Yac bu dakôm, dec oc dakôm Pômdau tac ñandê sa, bu in gêñ lêmun in ndê gêñ. Mac gauc gêñ bocke? Yac neñ licwalô hóc gêlêc in ndê, dec datôm bu tanlêc in ndê atac ñandê, a?

Dakôm neñ gêñ hoñ tu dapo Anötö waê sa-ñga

23 Mac nem lau ñatô sêsôm yom dañ bocdec bu, “Gêñ hoñ gitôm bu yac dakôm. Yao dañ yêc dom.” Tigen aô wasôm têñ mac bu gêñ hoñ oc êmwasiñ yac dom. Yomandô, gêñ hoñ gitôm bu yac dakôm, ma yao dañ yêc dom, magoc gêñ hoñ oc puc yac dôñ dom.

24 Ayob daôm bu akôm gêñ hoñ tu apo daôm sa-ñga dom, magoc akôm tu bu amwasin lau ñatô-ñga.

25 Wata nañ mac amlhi yêc maket ñamala, nañ aneñ ti atac lu-lu dom, aneñ ti atac pa su eñ.

26 Bu sêto yom yêc bocdec:

Nom sambuc, ma gêñ nom-ñga hoñ, nañ Pômdau ndê gêñ. *[BW 24:1]*

27 Ñamalac nañ kêñ whiñ dom, nañ bu êñgalêm mac bu aneñ gêñ awhiñ in, ma mac bu atac whiñ bu andi, nañ andi. Ma gêñ hoñ nañ in bu kêñ têñ mac, nañ aneñ ti atac lu-lu dom. Aneñ ti atac pa su.

28-29 Magoc ñgac dañ bu lic mac ma sôm bu, “Ei! Wata dinan sêkêñ ti da têñ gwam mun su,” nañ aneñ dom. Mac daôm anyalê ñapep ma atôm bu

anêḡ ti atac pa su, magoc tu ḡgac naḡ kêḡ puc mac-ḡga, dec anêḡ dom, bu aḡsôḡ iḡ ndê gauc dom. Lau naḡ sêkêḡ whiḡ ḡḡḡga, naḡ sêḡyalê bu gêḡ hoḡ naḡ Anötö kêḡ têḡ yac tu danêḡ-ḡga, naḡ yao daḡ kalhac ahuc dom. Magoc yac bu danêḡ gêḡ naḡ sêkêḡ ti da têḡ gwam, dec mboe ḡamalac naḡ kêḡ whiḡ gwalec, naḡ ndê gauc sa ḡapeḡ pi gêḡ dau dom, naḡ oc pu yac neḡ lêḡ yao mbasi-ḡga dinaḡ.

³⁰ Yac bu danêḡ gêḡ, naḡ danem daḡge Anötö muḡ, ma aö gatec bu lau sêpu yac tu gêḡ danêḡ-ḡga naḡ yac tam daḡge Anötö muḡ su ma taḡ-ḡga.

³¹ Bocdinaḡ, gêḡ hoḡ naḡ mac bu anêḡ ti anôm ma akôm, naḡ akôm ḡalêḡ ḡayham naḡ tôm bu po Anötö ndê waê sa.

³² Gauc nem lau hoḡ, lau Israel me lau Grik, ma lau hoḡ naḡ sêmbö Anötö ndê gôlôwac dabuḡ ḡalôm, ma ayob nem lêḡ hoḡ ḡapeḡ, bu akôm lau daḡ si sêkêḡ whiḡ tisac dom.

³³ Aö dauḡ neḡ lêḡ dinaḡ. Aö gayob neḡ lêḡ hoḡ bu ndic lau hoḡ tandô ḡayham. Aö gakôm tu bu wamwasiḡ dauḡ-ḡga dom, magoc gakôm tu bu wanem lau daêsam sa bu sêtap Anötö ndê mwasinḡ nem ḡac si-ḡga sa.

11

¹ Aḡkuc anêḡ lêḡ dinaḡ, tôm aö dauḡ kakuc Kilisi ndê.

ḡagôliḡ lauwhê ma laḡḡac sêlic om-ḡga

² Aö wampiḡ mac bu mac gauc gêm aö ḡapaḡ, ma mêtê naḡ aö kadôhônḡ ti gac dulu têḡ mac, naḡ mac asap dôḡ ḡapaḡ.

³ Magoc aö bu mac aňyalê ñapep bu Anötö in Kilisi ndê ñagôlôn, ma Kilisi in launğac si ñagôlôn, ma launğac sêti lauwê si ñagôlôn.

⁴ Nğac asa nañ ten mbec me hoc yom asê gitôm propet, magoc uñ gêñ dañ kôm in ndê ñagôlôn ahuc, nañ toc in ndê ñagôlôn Kilisi sa ñapep dom.

⁵ Ma awhê asa nañ ten mbec me hoc yom asê gitôm propet, magoc uñ gêñ dañ kôm in ndê ñagôlôn ahuc dom, nañ kôm in ndê ñagôlôn nañ in nakwen maya sa. Awhê dau in gitôm awhê nañ sêngalin kêclauñ hoñ su ginga, nañ lau sêlic tôm gêñ mayañ-ñga.

⁶ Bocdinañ, awhê asa nañ tec bu uñ gêñ tin ñagôlôn, nañ aňgapiñ in ndê kêclauñ hoñ su niñga. In bu maya tu aňgapiñ in kêclauñ su-ñga, dec êñkuc lauwê si lêñ solop, ma uñ gêñ dañ kôm ndê ñagôlôn ahuc.

⁷ Nahu bu in lêñ solop bu launğac sêuñ gêñ tin ñagôlôn dom, bu Anötö kêmasañ ñac bu sênem in angô sêmbô nom, ma sêtôc in ndê waê asê. Ma in lêñ solop bu lauwê sêuñ gêñ kôm si ñagôlôn ahuc, bu ñac sêtôc si launğac si waê asê.

⁸ Bu têñ ndoc Anötö kêmasañ gêñ hoñ, nañ ñgac sa akêñ awhê dom, magoc awhê sa akêñ ñgac.

⁹ Ma Anötö kêñ ñgac tu awhê-ñga dom, in kêñ awhê tu ñgac-ñga.

¹⁰ Tu dinañ-ñga, ma tu aňela-ñga, dec solop bu lauwê sêuñ gêñ tu bu sêtôc asê bu sêsôc si ñagôlôn ñapu.

¹¹ Magoc yêc yac lau nañ dakêñ whiñ Pômdau-ñga, nañ mac lauwê ambo tu daôm-ñga dom, ma mac launğac ambo tu daôm-ñga dom bocdinañ.

¹² Bu awhê ñamata-nga sa akêñ ñgac, ma tiñambu launḡac sêsa akêñ lauwhê. Ma gêñ hoñ meñ akêñ Anötö.

¹³ Akôc gauc ñapep pi lauwhê nañ sêten mbec têtñ Anötö magoc sêuñ gêñ dom. Mac añyalê dom bu in lêtñ so, a?

¹⁴ Ñamalac si lêtñ sêmbo-nga tôc sake asê pi gêñ dindec? Ñgac dan bu ndê kêclauñ baliñ, dec dasôm sake? Dalic gitôm gêñ mayañ-nga. Yomandô, me?

¹⁵ Ma awhê dan bu ndê kêclauñ baliñ, nañ dasôm sake? Dasôm bu gêñ dau po in ndê waê sa. Bu Anötö kêñ kêclauñ baliñ têtñ lauwhê bu êñgatôc ñac si ñagôlônñ ahuc.

¹⁶ Lau dan bu sêsen yom dec ma sêsôc ñapu dom, dec wasôm têtñ ñac bu yac ma Anötö ndê gôlôwac dabuñ hoñ tañkuc lêtñ tigenñ dindec, ma lêtñ dan tiyham yêc dom.

Lau Korin-nga senñ Mwasinñ Dabuñ ña lêtñ so

¹⁷ A ö bu wasôm yom pi mac nem lêtñ akac daôm sa tu alic om-nga. Aö wampinñ mac pi lêtñ dinanñ dom, magoc wandic yomsu mac. Mac nem lêtñ dau so, ma gêm gôlôwac dabuñ sa dom.

¹⁸ Gêñ ñamata-nga aö ganḡô ñawaê bu têtñ ndoc mac akac daôm sa, nañ mac awhê daôm kôc-kôc. Ma aö gauc gêm bu ñawaê nañ ganḡô, nañ yom tasanñ dom, magoc yom ñandô.

¹⁹ Inñ solop dom bu mac awhê daôm kôc-kôc êñkuc gêtñ nom-nga, magoc mac nem lêtñ ti sakinñ bu whê mac kôc-kôc ma tôc asê bu lau nde sêkêñ whinñ ñanḡa ma lau nde sêkêñ whinñ gwalec, dec inñ lêtñ solop.

²⁰ Têñ tēm mac akac daôm sa bu aneñ Pômdau ndê Mwasin, nañ mac gauc gêm bu añ ñapep. Magoc aö wasôm bu gêñ nañ mac añ, nañ Pômdau ndê Mwasin dom.

²¹ Bu têtñ ndoc mac bu aneñ gêñ, nañ mac hon añ têtñ e lau ñatô gêñ yô ñac, magoc lau ñatô sênôm gêñ e kêtññ ñac.

²² Bocke? Mac nem andu sêlhac dom, a? Gitôm bu mac aneñ ti anôm gêñ yêc nem andu muñ su, goc akac daôm sa. Mac nem lêtñ aneñ Mwasin Dabuñ-nga tôc asê bu mac apu nem asidôwai nañ sêmbo Anötö ndê gôlôwac dabuñ ñalôm, ma alic ñayham bu akôm lau ñalôm sawa maya sa. Aö wasôm yom bocke têtñ mac? Mac gauc gêm bu aö wampin mac pi gêñ dinañ, a? Mba andô!

Pômdau ndê yom pi Mwasin Dabuñ

(Mat 26:26-28; Mak 14:22-24; Luk 22:17-20)

²³ Bu yom nañ aö gac dulu têtñ mac pi Mwasin Dabuñ, nañ Pômdau dau kêtñ têtñ aö bocdec bu. Têtñ ôbwêc nañ Judas hoc Pômdau Yisu asê, nañ Yisu kôc bolom sa,

²⁴ gêm danje Anötö, ma pô kôc goc sôm, “Aö neñ ñandô dau dec, nañ wakêtñ tu mac-nga. Aneñ gêñ dindéc tu bu gauc nem aö-nga.”

²⁵ Ñac señ gêñ daneñ-nga su, ma ñalêtñ tigen in kôc laclhu wain-nga dan ma sôm, “In dindéc aneñ dac, nañ aö wakêc sin tu wamatin pwac wakuc-nga. Têm hon nañ mac bu anôm wain mwasin dindéc-nga tiyham, nañ akôm tu bu gauc nem aö-nga.”

²⁶ Gauc nem Pômdau ndê yom dinañ ñapep, bu têm bocke nañ mac bu aneñ bolom ti anôm wain

Mwasin Dabuŋ-nga tiyham e in mbu meŋ, naŋ gitôm mac ahoc in ndê mbac ndu ŋawaê asê.

Daneŋ Mwasin Dabuŋ ŋambwa dom

²⁷ Bocdinaŋ dec asa naŋ bu neŋ bolom dau me nôm yêc Pômdau ndê laclhu, magoc gauc gêm ŋahu ti toc sa ŋapep dom, naŋ kôm giso pi Pômdau ndê ŋandô ti dac.

²⁸ Lau tigen-tigen honj sêtôc gwaniŋ dau si lêŋ muŋ su, goc sêneŋ bolom ti sênôm yêc laclhu.

²⁹ Ŋahu bu asa naŋ bu neŋ ti nôm magoc in ndê gauc sa ŋapep pi Pômdau ndê ŋandô dom,* naŋ oc tap Anötö ndê matôc sa tu in ndê lêŋ neŋ Mwasin Dabuŋ-nga.

³⁰ Tu dinaŋ-nga dec mac nem lau daêsam licwalô mbasi ma gêmbac kôm ŋac, ma ŋatô sêmbac ndu su.

³¹ Yac bu taŋsahê daŋ ŋapep, dec oc datap Pômdau ndê matôc kaiŋ dinaŋ sa dom.

³² Magoc Pômdau kêŋ ŋawapac têŋ yac ti kêmatôc yac tu bu danem daŋ kwi e dandiŋaŋ dawhiŋ lau sac nom-nga dom.

³³ Bocdinaŋ aneŋ asidôwai, aŋgô ŋapep. Têŋ ndoc mac akac daôm sa bu aneŋ Mwasin Dabuŋ, naŋ ayob bu akôm ŋalêŋ naŋ toc asidôwai honj sa ŋapep.

³⁴ Ŋamalac daŋ bu gêŋ yô in basô, naŋ neŋ gêŋ yêc ndê andu muŋ. Ma bocdinaŋ têŋ ndoc mac akac

* **11:29:** Lau ŋatô gauc gêm bu Pol ndê yom pi 'Pômdau ndê ŋandô' hêganôŋ gôlôwac dabuŋ (tôm in to yêc 1 Kor 10:17), dec Pol to bu kêŋ puc lau naŋ seŋ Mwasin Dabuŋ magoc sêtoc si asidôwai sa ŋapep dom (11:17-22). Ma lau ŋatô gauc gêm bu yom dau hêganôŋ Yisu dau ndê ŋandô (1 Kor 10:16), dec Pol to bu kêŋ puc lau naŋ sêlic sac gitôm gêŋ ŋambwa ma seŋ Mwasin Dabuŋ, bu lau dau sêŋyalê dom bu gêŋ dau piŋ ŋac dôŋ sem damiŋ Yisu ndê ŋandô.

sa, nañ oc tòm dom bu atap Pômdau ndê matôc sa tu akôm gêñ bambaliñ-ñga. Gauc nem yom dinañ, ma têtñ ndoc aô watêtñ mac waloc, nañ oc wawhê gêñ ñatô sa têtñ mac tiyham.

12

Ñalau Dabuñ ndê Mwasinñ Ñalôm-ñga

¹ O asidôwai, yêc mac nem bapia, mac ato yom ñatô pi Ñalau Dabuñ ndê mwasinñ, ma kwahic dec aô bu wato yom bu wawhê mac nem gauc sa ñapep.

² Mac añyalê ñalêñ nañ Sadañ gêm gôliñ mac nem gauc têtñ têm mac akêñ whinñ su dom, ma wê mac asa lêñ anem akinñ anötöi gwam awha mba-ñga.

³ Tu dinañ-ñga dec mac oc atôm bu añyalê yom nañ aô bu wasôm têtñ mac bocdec bu. Anötö ndê Ñalau bu nem gôliñ ñamalac dañ ndê whasuñ, dec inñ oc tòm dom bu sôm bu, “Aô wapucho Yisu.” Ma ñamalac nañ Ñalau Dabuñ gêm gôliñ inñ dom, nañ oc tòm dom bu hoc yom asê ma sôm bu, “Yisu inñ Pômdau.”

⁴ Yac datap mwasinñ tidau-tidau sa, magoc menñ akêñ Ñalau tigenñ.

⁵ Ma yac tam akinñ Pômdau ñalêñ tidau-tidau, magoc tam akinñ Pômdau tigenñ.

⁶ Ma yac dakôm gwelenñ tidau-tidau tu danem akinñ Anötö-ñga, magoc Anötö tigenñ kôm gwelenñ yêc yac hoñ neñ ñalôm, ma kêtñ ñaclai têtñ yac bu dakôm gêtñ dau.

⁷ Ma gêtñ hoñ nañ lau tigenñ-tigenñ sêkôm ña Ñalau ndê ñaclai, nañ Anötö kêtñ tu bu êmwasinñ yac lau hoñ nañ dambo gôlôwac dabuñ ñalôm, ma puc yac hoñ dôñ.

⁸ Njalau Dabuŋ kên yom ti gauc têtŋ ŋamalac daŋ bu hoc asê têtŋ gôlôwac dabuŋ. Ma Njalau tigen dinaŋ kên gauc têtŋ ŋamalac daŋ tiyham, bu êŋyalê gêŋ naŋ ŋahu sip ŋalôm gi, ma sôm asê têtŋ lau.

⁹ ŋamalac daŋ oc tap mwasiŋ kên whiŋ ŋaŋga-ŋga sa, ma daŋ tiyham oc tap mwasiŋ kôm lau ti gêmbac ŋayham sa-ŋga yêc Njalau tigen dinaŋ.

¹⁰ ŋamalac daŋ oc kôc ŋaclai bu kôm gêŋ dalô, ma daŋ oc kôc mwasiŋ tu hoc yom asê tôm lau propet-ŋga. Daŋ tiyham oc kôc mwasiŋ bu êŋyalê bu lau naŋ sêhoc yom asê, naŋ Njalau Dabuŋ gêm gôliŋ ŋac, me ŋalau daŋ dau-ŋga daŋ gêm gôliŋ ŋac. Ma daŋ oc kôc mwasiŋ bu sôm yom awha wakuc-ŋga naŋ iŋ kêyalê muŋ su dom. Ma ŋamalac daŋ tiyham oc tap mwasiŋ sa bu êŋyalê yom awha wakuc-ŋga kain dinaŋ ma nem kwi.

¹¹ Gwelen tidau-tidau hoŋ dinaŋ meŋ akêŋ Njalau tigen dinaŋ, naŋ gic sam iŋ ndê mwasiŋ ti ŋaclai têtŋ lau tigen-tigen tôm iŋ dau gêlic ŋayham.

Lau sêkêŋ whiŋ-ŋga sêti gôlôwac dabuŋ tigen

¹² Alic su naŋ. ŋamalac daŋ ndê ŋandô tigen, magoc iŋ amba ti gahi ma tandô ma ŋagêŋ daêsam. Magoc gêŋ hoŋ dinaŋ sêyêc têtŋtêtŋ dom, sêyêc ŋandô tigen dinaŋ. Ma ŋalêŋ tigen, yac lau naŋ dambo Kilisi ndê gôlôwac dabuŋ ŋalôm, naŋ dati ŋandô tigen.

¹³ Bu Anôtô kêku yac ŋa Njalau Dabuŋ ma piŋ yac dôŋ dati gôlôwac dabuŋ tigen. Yac neŋ lau ŋatô lau Israel-ŋga, ma ŋatô ŋac lau gameŋ apa-ŋga. ŋatô sem akiŋ ŋadaui nom-ŋga, ma ŋatô sem akiŋ dom. Magoc yac hoŋ dakôc Njalau tigen sip yac neŋ ŋalôm têtŋtêtŋ.

14 Ma ñamalac dañ ndê ñandô ñagêñ honj kainj tigenj dom. Gêñ tidau-tidau sêyêc ñandô tigenj dinaj.

15 Inj ndê gahi bu sôm bu, “Aö amba dom, bocdinañ gati ñandô ñagêñ dañ dom,” dec yom dau oc kac gahi dau su yêc ñandô dinañ dom.

16 Me inj ndê dañgasuñ bu sôm bu, “Aö tandô dom, bocdinañ gati ñandô ñagêñ dañ dom,” dec yom dau oc kac dañgasuñ su yêc inj ndê ñandô dom.

17 Ma gêñ honj nañ sêyêc yac neñ ñandô bu tanôñ honj, dec oc dañgô yom ñalêñ bocke? Ma gêñ honj nañ sêyêc yac neñ ñandô bu dañasunj honj, dec oc dañgu gêñ ñamalu ñalêñ nde?

18 Magoc yac neñ ñandô inj bocdinañ dom. Anötö dau kêmasañ yac neñ ñandô ñagêñ tidau-tidau honj tôm inj dau gêlic ñayham.

19 Ma yac neñ ñandô ñagêñ honj bu kainj tigenj, dec yac oc dambo ñalêñ bocke? Oc tôm dom bu dambo.

20 Magoc yac ñagêñ daêsam sêyêc ñandô tigenj dinañ ñalôm, dec dambo ñayham.

21 Oc tôm dom bu tandô sôm têtj amba, “Am bu mbo dom, aö wambo ñayham eñ.” Ma tôm dom bu ñagôlôñ sôm têtj gahi, “Am bu mbo dom, oc wambo ñayham eñ.”

22 Mba andô! Yac ñagêñ ñatô dalic bu gêñ licwalô mba, tigenj gêñ dau bu yêc dom, dec oc dambo ñayham dom.

23 Ma ñandô ñagêñ ñatô nañ dalic bu gêñ waêmbe, nañ datoc sa têtj ndoc dakôm ahuc ña po. Ma ñagêñ nañ dalic bu gêñ mayañ-nga, nañ dakôm ahuc ti dayob ñapep.

24 Magoc ñagêñ ñatô nañ dalic bu gêñ ñayham tu

lau sêlic-nga, nan sêpônda gôlôn dom, ma dakôm ahuc dom. Anötö dau kêmasan yac ñagêñ hon dinan, ma toc gêñ ñambwa-ñambwa sa kêlêc.

²⁵ In kêmasan ñamalac ñalêñ dinan tu bu ñagêñ hon sênem ñandô tigen dinan sa, ma sêwhê dau kôc-kôc dom.

²⁶ Yac ñagêñ dan bu êñsahê ñandê, dec ñagêñ hon oc sêñsahê ñandê sêwhin. Ma ñagêñ dan bu tap waê sa, dec ñagêñ hon oc atac ñayham sêwhin.

²⁷ Angô su nan! Mac lau tigen-tigen hon ati Kilisi ndê ñandô tigen, nan gôlôwac dabun.

²⁸ Ma Anötö kêyalin lau sa yêc gôlôwac dabun ñalôm bocdec bu. Lau ñamata-nga ñac lau aposel, lau tilu-nga lau propet, ma lau titô-nga in kêñ ñac bu sêndôhôn gôlôwac dabun. Ma in kêmwasiñ lau ñatô bu sêkôm gêñ dalô, ñatô sêkôm lau gêmbac ñayham sa, ñatô bu sênem lau sa, ma ñatô bu sênem gôlin gôlôwac dabun. Ma ñatô sêtap mwasin sêsôm yom awha wakuc-nga sa.

²⁹ Mac gauc gêm bocke? In kêmwasiñ lau hon tu bu sêti aposel, a? Ñac hon sêti propet, a? Ñac hon kêdôhônwaga, a? Hon sêkôm gêñ dalô, a?

³⁰ Ñac hon sêtap mwasin sêkôm gêmbac ñayham sa-nga, a? Ñac hon sêkôc mwasin sêsôm yom awha wakuc-nga me sênem yom awha wakuc kwi-nga, a? Mba andô!

³¹ Bocdinan dec aô wasôm têt mac, bu tamkwê mwasin ñandô nan oc nem lau hon sa êñlêc. Ma lêt nan kwahic dec aô bu watôc têt mac nan hêc gêlêc lêt hon su.

13

Mêtê ñandô atac whin-nga

¹ Aö bu watôm bu wasôm ñamalac si yom ma aņjela si yom, magoc mêtê atac whiņ-ņga m ba yêc aö, naņ aö gatôm geņgelen me oņ naņ taņ ñambwa.

² Ma aö bu wahoc yom asê gitôm propet, ma bu waņyalê gêņ hoņ naņ ñahu sip ñalôm gi, ma watap gauc atu sa pi gêņ hoņ, ma bu wakêņ whiņ ñaņga tôm bu wasôm têņ lôc daņ bu puc dau sa ma lom gameņ wakuc ndi, tigeņ mêtê atac whiņ-ņga mba yêc aö, dec aö gatôm gêņ ñambwa.

³ Ma aö bu wakêņ aneņ gêņ hoņ tu wanem lau ñalôm sawa sa-ņga, me wakêņ dauņ sambuc tu gwelen ñawaê ñayham-ņga e tôm ñacyo sêkêņ ya neņ aö su, magoc mêtê atac whiņ-ņga bu mba yêc aö, dec oc tôm dom bu wapo dauņ sa tu gêņ hoņ dinan ñadaņ-ņga.

⁴ Mêtê atac whiņ-ņga ñandô ñahu bocdec. Ñamalac naņ mêtê atac whiņ-ņga kêsalê iņ ahuc, naņ kôc ndê ñalôm dôņ, ma kêmwasin lau. Iņ gêm lêmuņ lau ñatô dom, ma sôm yom toc dau sa-ņga me po dau sa ñambwa dom.

⁵ Iņ kôm gêņ mayañ-ņga dom, gauc gêm gêņ tu êmwasiņ dau-ņga kêlêc dom, ma atac ñandê ñagahô dom. Ma iņ hê yom dôņ pi sac naņ lau sêkôm têņ iņ, naņ dom.

⁶ Mêtê naņ so lêņ gitêņ, naņ ñadaņ oc kôm iņ atac ñayham dom, magoc iņ oc atac ñayham tu lau hoņ naņ sêņkuc yom ñandô-ņga.

⁷ Iņ oc hêc kisa ti atac pa su. Iņ oc hu iņ ndê kêņ whiņ ti gêņ bocke naņ iņ takwê, naņ siņ dom, ma ñawapac daņ oc ku iņ dulu dom.

⁸ Mêtê atac whiņ-ņga oc yêc ñapan. Magoc mêtê dahoc yom asê gitôm propet-ņga oc pacndê. Ma

mêtê dasôm yom awha wakuc-nga ma gauc pi gêñ nanj nahu sip ñalôm gi, nanj oc sêninga.

⁹ Nahu bu têtj têtj kwahic dec-nga yac tanjalê gêñ honj timala dom, ma yom nanj lau propet sêhoc asê, nanj tôc gêñ honj asê timala dom.

¹⁰ Magoc têtj ndoc Yisu mbu menj, nanj inj oc ndic dabinj gêñ honj, ma mêtê honj nanj kwahic dec dakôm timala dom, nanj oc pacndê.

¹¹ Têtj têtj nanj aô gambo balê, nanj gasôm yom gitôm balê, ma kayalê gêñ gitôm balê, ma gakôc gauc gitôm balê. Magoc têtj ndoc aô gati ñgac su, nanj gahu balêkoc si mêtê sinj.

¹² Kwahic dec yac tanjalê gêñ honj yêc awê dom, gitôm datôc gwaninj sip busunôm* ñadaun-dauñ ñan. Magoc têtj têtj ñambu-nga yac oc dalic gêñ honj yêc awê enj. Kwahic dec aô kayalê gêñ timala dom, magoc tinambu aô oc wanjalê gêñ honj timala, tôm Anôtô kêyalê aô e pi sa timala enj têtj kwahic dec.

¹³ Mêtê atu tö kwahic dec sêyêc, mêtê dakêñ whinj-nga, mêtê dakêñ batanj-nga, ma mêtê atac whinj-nga. Magoc mêtê atac whinj-nga tinamata mêtê honj.

14

Tanjkwê mwasiñ nanj tôm bu puc gôlôwac dabuñ dôñ

¹ Bocdinañ asap mêtê atac whinj-nga dôñ, ma tamkwê Ñalau Dabuñ ndê mwasiñ tidau-tidau. Ma tamkwê mwasiñ bu ahoc yom asê nditôm lau propet hóc gêlêc mwasiñ ñatô su.

* **13:12:** Busunôm - lau ñatô sêsam bu glas tasalagatu, ma yêc Yom Inglis sêsôm bu 'mirror.'

² Bu Njalau ndê mwasiñ dasôm yom awha wakuc-nga inñ gêñ ñamata-nga dom. Ñamalac nañ sôm yom awha wakuc-nga, nañ ndê yom yêc inñ ma Anötö ñasawa, ma lau dañ oc s êñyalê dom. Inñ sôm yom nañ ñahu yêc siñ dau, tòm Njalau Dabuñ kac inñ.

³ Magoc ñamalac nañ hoc yom asê gitôm propet, nañ ndê yom gitôm bu po gôlôwac dabuñ sa, ma êñgilí ñac bu sêlhac ñaŋga ma nem malô ñac si ñalôm.

⁴ Ñamalac nañ sôm yom awha wakuc-nga, nañ ndê yom dau gêm inñ tawasê sa, magoc ñamalac nañ hoc yom asê gitôm propet, nañ ndê yom oc tòm bu po gôlôwac dabuñ hoñ sa.

⁵ Aö tac whiñ bu mac hoñ asôm yom awha wakuc-nga, tigenñ aö tac whiñ kêlêc bu mac ahoc yom asê atôm propet. Bu ñamalac nañ hoc yom asê gitôm propet, nañ ndê mwasiñ hóc gêlêc inñ nañ sôm yom awha wakuc, nañ ndê su. Magoc ñamalac dañ bu mbo mac nem gôlôwac dabuñ ñalôm, nañ kôc mwasiñ bu nem yom awha wakuc-nga kwi têt mac, dec yom dau oc tòm bu nem mac sa, tòm yom nañ ñamalac hoc asê gitôm propet.

Mwasiñ dasôm yom awha wakuc-nga ñahu

⁶ O asidôwai, aŋgô su nañ. Aö bu watêt mac waloc, ma wasôm yom têt mac ña awha wakuc dañ, dec oc wanem mac sa ñalêt bocke? Ti geñ aö bu waloc ma Njalau Dabuñ kêt yom têt aö, tu bu wahoc asê têt mac, me tu wawhê nem gauc sa me wandôhôn mac-nga me wahoc asê gitôm propet, dec aneñ yom dau oc nem mac sa.

⁷ Akôc gauc pi gêt nañ dakôc tu danem wê sip-nga, gitôm gasuc me gita. Ñamalac dañ bu yu me

ndic napep dom, dec asa oc tòm bu ênyalê wê dau nawa?

⁸Ma ngac ndic dahuc-nga bu ndic napep dom, dec asa oc êmasañ dau tu ndic siñ-nga?

⁹Ma mac lau nañ asôm yom awha wakuc-nga yêc gôlôwac dabuñ nâlôm, nañ bocdinañ. Bu yom kainñ dinañ nahu yêc awê dom, ma lau oc sênyalê nâlêñ bocke? Mac oc asôm yom dau tòm gêñ ñakêcsia nambwa-ñambwa.

¹⁰Lau nom-nga si awha têtêtêñ daêsam yêc, ma lau nañ sêsôm dau si awha, nañ sênyalê nahu.

¹¹Ngac dañ bu sôm dau ndê awha ma aö bu wanjalê nahu dom, dec aö walic inñ gitôm ngac apa, ma inñ oc lic aö bu ngac apa bocdinañ.

¹²Ma yêc mac-nga bocdinañ. Mac tamkwê Nalau Dabuñ ndê mwasiñ, bocdinañ dec tamkwê mwasiñ nañ tòm bu po gôlôwac dabuñ sa, nañ hóc gêlêc mwasiñ ñatô, tu bu akôm gôlôwac dabuñ ênsôwec tiatu.

¹³Bocdinañ dec ñamalac nañ sôm yom awha wakuc-nga, nañ teñ mbec bu Anötö kêñ mwasiñ nem yom dau kwi-nga têt inñ whiñ mañ.

¹⁴Bu têt ndoc aö gateñ mbec ña yom awha wakuc-nga, nañ aö dañ neñ gatuj teñ mbec, magoc aneñ gauc kêkuc mbec dau dom.

¹⁵Bocdinañ aö oc wakôm sake? Aö wateñ mbec ña awha wakuc nañ aneñ gatuj kêyalê, ma wateñ mbec ña aö dañ neñ awhañ nañ kayalê nahu, nañ whiñ. Aö wanem wê awha wakuc nañ aneñ gatuj kêyalê, ma wanem wê ña dañ neñ awhañ nañ kayalê nahu, nañ whiñ.

¹⁶Am bu êmpinñ Anötö ña yom awha w akuc-nga,

tôm nem gatôm kêyalê, ma ñamalac dañ bu mbo gôlôwac dabuñ ñalôm nañ kêyalê awha dau dom, dec iñ oc tôm dom bu sôm, “Yomandô,” têtñ ndoc am gic bata nem yom. Nahu bu iñ gêm gauc yom nañ am sôm.

¹⁷ Am daôm gêm d añge Anötö ñapep, magoc am nem yom gêm ñamalac dinan sa dom.

¹⁸ Aö gam danje Anötö bu iñ kêtñ mwasiñ wasôm yom awha wakuc-ña têtñ aö hóc gêlêc mac hon su.

¹⁹ Magoc têtñ têtñ nañ aö gambo gôlôwac dabuñ ñalôm, nañ aö tac whiñ bu wasôm yom nañ lau hon sênjalê, tu bu wandôhôn ñac-ña. Aö bu wasôm yom ñalhô aman dan nañ ñahu yêc awê, nañ hóc gêlêc bu wasôm yom awha wakuc-ña ñalhô 10,000, nañ lau hon sênjalê ñahu dom.

²⁰ O asidôwai hac. Akôc gauc ñapep, atôm lau atu-tu. Akôc gauc atôm balêkoc sauñ dom. Ambo atôm balêkoc dedec tu gêtñ tigen-ña, nañ tu ambo ahê lêtñ sac-ña.

²¹ Gauc nem yom nañ Pômdau sôm, nañ sêto yêc bocdec bu:

Aö wanñiñ lau apa sênem aö awhan ma wakêtñ puc lau dindec ña lau apa dau awha. Magoc ñac oc sêkêtñ danja aö dom, tôm sêkêtñ danja aneñ yom muñ su dom. *[Ais 28:11-12]*

²² Pômdau kêtñ lau nañ sêsôm yom awha apa gitôm gêtñ dalô kain dan, bu kêtñ puc lau Israel-ña nañ sêkêtñ whiñ iñ dom. Ma mwasiñ dasôm yom awha wakuc-ña iñ kain tigen. Anötö kêtñ gitôm gêtñ dalô tu lau nañ sêkêtñ whiñ dom-ña. Iñ kêtñ tu lau sêkêtñ whiñ-ña-ña dom. Magoc mwasiñ dahoc yom asê tôm propet-ña, nañ iñ kêtñ tu lau

sêkêŋ whiŋ-ŋga-ŋga. In kêŋ tu lau naŋ sêkêŋ whiŋ dom naŋ-ŋga dom.*

²³ Bocdinaŋ, mac lau akêŋ whiŋ-ŋga bu akac daôm sa ma mac hoŋ bu asôm yom awha wakuc-ŋga, ma lau ŋatô naŋ sêkêŋ whiŋ dom me si gauc sa pi gêŋ dau dom, naŋ bu sêmbo sêwhiŋ mac, dec ŋac oc sêsôm sake? Ŋac oc sêsôm bu mac nem gauc kêŋsôŋ.

²⁴ Magoc mac hoŋ bu ahoc yom asê atôm propet têŋ ndoc lau kainŋ dinaŋ sêmbo sêwhiŋ mac, dec mac nem yom oc kuŋ ŋac si ŋalôm e sêŋyalê bu sic waê bu sêtap matôc sa tu ŋac si mêtê sac-ŋga.

²⁵ Ma yom pi ŋac si mêtê sac, naŋ ŋac gauc gêm bu sêsiniŋ yêc ŋac si ŋalôm, naŋ mac nem yom oc puc asê tiawê. Ma bocdinaŋ ŋac oc sêpôŋ haduc aŋgô andô têŋ nom ma sêtoc Anötö sa. Ma ŋac oc sêsôm asê bu, “Anötö mbo whiŋ mac, yomandô!”

Pol whê ŋagôlinŋ om-ŋga sa

²⁶ Bocdinaŋ asidôwai, têŋ ndoc mac akac daôm sa tu alic om-ŋga, naŋ lau ŋatô sêkôc wê sêmenŋ, lau ŋatô sêkôc yom bu sêndôhônŋ lau, lau ŋatô sêkôc yom naŋ Ŋalau Dabuŋ hoc asê têŋ ŋac, ŋatô sêsôm yom awha wakuc-ŋga, ma ŋatô sênem yom awha

* **14:22:** Aisaya ndê yom, naŋ Pol to yêc ŋabatinŋ 21, naŋ hêganônŋ lau apa naŋ Pômdau kêkinŋ bu sêŋgwiniŋ lau Israel-ŋga naŋ sêsôc inŋ ŋapu ti sêkêŋ whiŋ inŋ dom. Pol gêm dôhônŋ lau apa awha, naŋ lau Israel si ŋacyo dinaŋ sêsôm, ma mwasiŋ dasôm yom awha wakuc-ŋga. Lau Israel-ŋga sêkac si ŋalôm kwi tu lau apa si yom-ŋga dom, ma Pol bu tôc asê bu ŋalêŋ tigenŋ, yom awha wakuc oc nem lau naŋ sêkêŋ whiŋ dom, naŋ sa dom, me kac si ŋalôm kwi e sêti lau sêkêŋ whiŋ-ŋga dom. Ŋabatinŋ 23 whê gêŋ dau sa tiawê.

wakuc-nga dau kwi. Gêñ hoñ nañ mac bu akôm, nañ akôm tu apuc gôlôwac dabuñ hoñ dôñ-nga.

²⁷ Lau bu sêsôm yom awha wakuc-nga, dec lu me tō sêsôm goc tôm. Dañ sôm e pacndê, goc ñamalac tilu-nga sôm ndê. Ma ñamalac dañ nem ñac si yom dau kwi mañ.

²⁸ Magoc ñamalac nem y om dau kwi-nga dañ bu mbo dom, goc ñamalac nañ tac whiñ bu sôm y om awha wakuc-nga nem dau dôñ yêc gôlôwac dabuñ ñalôm. Tôm bu iñ sôm iñ ndê yom awha wakuc-nga têñ ndoc iñ mbo tawasê, ma yom dau yêc iñ ma Anötö ñasawa.

²⁹ Ma lau bu sêhoc yom asê sêtôm propet yêc gôlôwac dabuñ ñalôm, dec lu me tō sêhoc yom asê, ma lau hoñ sêkêñ danğa ñapep ma sêñsahê yom dau.

³⁰ Ñamalac dañ bu ndöc mac ñalôm, ma Ñalau Dabuñ bu hoc yom dañ asê têñ iñ, dec ñamalac nañ sôm yom mbo, nañ hu siñ ma kêñ ñasawa têñ ñamalac dinañ bu sôm yom dau asê.

³¹ Gitôm bu mac hoñ ahoc yom asê atôm propet aô daôm aô daôm, bu andôhôn ti apuc gôlôwac dabuñ hoñ dôñ.

³² Lau nañ sêtap mwasin sa bu sêhoc yom asê sêtôm propet, nañ sêtôm bu sênem gôliñ dau si lêñ sêhoc yom dau asê-nga.

³³ Bu Anötö tec bu iñ ndê lau sêkôm gêñ bambaliñ. Iñ Anötö yom malô-nga.

Anötö ndê gôlôwac dabuñ hoñ sêñkuc lêñ tigen bocdec bu.

³⁴ Têñ ndoc mac akac sa tu alic om-nga, nañ lauwhê sêsôm yom dom sic ñawaê. Ñac sêsôc launğac ñapu tôm yomsu sôm, ma sênem dau dôñ.

³⁵ Awhê dañ bu ñgô yom dañ nañ inñ kâyalê ñahu dom, nañ nem dau dôn e om pacndê, ma ndac nakweñ têt ndoc inñ sêmbo si andu. Inñ bu sôm yom yêc gôlôwac dabuñ ñalôm, nañ gêt mayañ-nga.

³⁶ Mac lau Korin-nga bu atec aneñ yom dindec, goc wandac mac bocdec bu. Anötö kêt ndê yom têt mac tamwasêm, me kêt têt mac muñ bu andic dulu têt lau ñatô, a?

³⁷ Asa nañ gauc gêm bu inñ propet dañ, me tap Ñalau Dabuñ ndê mwasin sa kêtêc, nañ ênyalê bu yom nañ gato têt mac, nañ Pômdau dau ndê yatu.

³⁸ Ñamalac dañ bu kôc aneñ yom sa dom, nañ Pômdau oc kôc inñ sa dom.

³⁹ Bocdinañ aneñ asidôwai, tamkwê mwasin bu ahoc yom asê atôm lau propet, ma alhac lau nañ sêsôm yom awaha wakuc-nga, nañ ahuc dom.

⁴⁰ Magoc têt ndoc mac bu alic om, nañ akôm gêt honñ ñapep ma anñkuc lêt solop.

15

Pol puc yom nañ inñ hoc asê pi Yisu, nañ dôn

¹ O asidôwai, aô bu wawhê mac nem gauc sa tiyham pi ñawaê ñayham nañ gahoc asê têt mac muñ su. Mac akôc ñawaê dau sa, ma ti mac nem akêt whinñ ñahu.

² Ñawaê ñayham nañ gahoc asê têt mac, nañ tôc lêt Anötö nem mac si-nga asê, ma bocdinañ dec asap dôn ñapañ. Mac bu asap dôn dom, dec mac nem akêt whinñ oc tisac ma ñandô mbasi.

³ Bu yom nañ gac dulu têt mac, nañ kêtêc yom nañ aô dauñ gañgô muñ su. Ma yom nañ atu ma tinamata aneñ yom honñ, nañ bocdec bu. Kilisi

mbac ndu tu yac neŋ sac-ŋga, tòm yom naŋ sêto yêc, naŋ sôm.

⁴ Lau sêŋsuhun in, ma têŋ bêc titö-ŋga Anötö un in sa, tòm sêto yêc naŋ.

⁵ Goc in hoc dau asê têŋ Pita, ma têŋ lau ŋatô naŋ sêmbo †ŋgacsêŋomi 12 si toŋ.

⁶ Ma tiŋambu in hoc dau asê têŋ asidôwai toŋ atu naŋ sêmbo sêwhin dau. Nac lau daêsam, sêhóc gêlêc 500 su. Kwahic dec ŋac si lau ŋatô sêmbac ndu su, magoc daêsam gacgeŋ sêmbo tali.

⁷ Tiŋambu in hoc dau asê têŋ Jems ma têŋ lau aposel hoŋ.

⁸ Ma tiŋambu andô in hoc dau asê têŋ äo daun, naŋ gati aposel gitôm balêkoc naŋ dinda kôc so ndê têm.

⁹ Bu äo galic daun tòm lau aposel si ŋac ŋambu-ŋga solop. Sêsam äo bu aposel, magoc äo ŋac ŋayham dom bu sêhê ŋaê aposel pi äo. Nahu bu muŋ-ŋga lê äo gakêŋ kisa Anötö ndê lau sêkêŋ whin-ŋga.

¹⁰ Magoc tu Anötö kêmwasin äo-ŋga, dec äo gati aposel, ma in ndê mwasin dau meŋ ŋambwa dom. Mba! Bu äo gakôm gwelen gahoc gêlêc Kilisi ndê aposel hoŋ su. Magoc äo daun gakôm dom. Anötö ndê mwasin puc äo dôŋ, dec kêŋ ŋaclai têŋ äo bu wakôm gwelen.

¹¹ Bocdinaŋ anyalê ŋapep bu yom naŋ äo gahoc asê pi Kilisi, ma aposel hoŋ sêhoc asê, in yom tigen. Ma yom dau ti mac nem akêŋ whin ŋahu.

Lau batê oc sêtisa

12 Yac am mêtê ma ahoc asê bu Anötö uŋ Kilisi sa akêŋ lau batê-ŋga. Ma bocdinaŋ bocke dec mac nem lau ŋatô sêsôm bu lau batê oc sêtisa dom?

13 Aŋgô! In bu yom ŋandô bu lau batê sêtôm dom bu sêtisa, dec tôm dom bu Kilisi dau tisa ma mbo tali tiyham bocdinaŋ.

14 Ma Kilisi bu tisa su dom, dec mêtê naŋ yac am, naŋ oc ŋahu mbasi, ma mac nem akêŋ whiŋ ŋahu mbasi bocdinaŋ.

15 Ma gêŋ daŋ tiyham. Yac lau aposel am mêtê ma asôm bu Anötö uŋ Kilisi sa akêŋ lau batê-ŋga. Magoc mac asôm bu lau batê oc sêtisa dom. Mac nem yom bu yom ŋandô, dec mêtê naŋ yac ahoc asê pi Anötö, naŋ yom tasaŋ.

16 Bu lau batê bu sêtisa dom, dec Kilisi dau tisa su dom.

17 Ma in bu yom ŋandô bu Anötö uŋ Kilisi sa su dom, dec mac nem akêŋ whiŋ oc ŋandô mbasi, ma mac nem sac gacgeŋ yêc mac-ŋga.

18 Ma Anötö bu uŋ Kilisi sa su dom, dec lau naŋ sêkêŋ whiŋ Yisu ma sêmbac ndu su, naŋ gacgeŋ siŋga su.

19 Tu Kilisi-ŋga dec yac dakêŋ batanaŋ bu Anötö oc uŋ yac hoŋ sa têtê têtê ŋambu-ŋga. Yom dau bu yom ŋandô dom, dec gêŋ naŋ dakêŋ batanaŋ, naŋ gêŋ têtê kwahic dec-ŋga ŋambwa ma ŋandô mbasi têtê têtê ŋambu-ŋga. Ma lau hoŋ oc sêpu yac ma sêlic yac tôm lau gauc mbasi-ŋga.

20 Magoc Anötö uŋ Kilisi sa akêŋ lau batê-ŋga yomandô. In gitôm lau hoŋ naŋ sêmbac ndu su, naŋ si ŋgac mbêc.

21 Ŋamalac tigeŋ ti dambac ndu ŋahu. Ma ŋamalac tigeŋ ti datisa akêŋ lau batê-ŋga ŋahu.

²² Yomandô! Tu Adam-nga dec yachon dawêkain sen dambac ndu-nga. Magoc tu Kilisi-nga dec lau nan sêkên whin in, nan sêwêkain sen sêmbo tali-nga.

²³ Tigen lau nan sêmbac ndu, nan oc sêtisa tôm ndoc. Kilisi tisa muṅ, gitôm gêṅ ndô mbêc. Ma tēṅ ndoc in mbu meṅ, nan lau nan sêti in ndê, nan oc sêtisa.

²⁴ Têṅ dinan in oc ndic bata tēm kwahic dec-nga, ma in oc sen ṅac lai ti ṅagôlin hon su, ma kên gêṅ hon sip Daman Anötö amba bu nem gôlin.

²⁵ Bu Kilisi gic waê bu nem gôlin e in kên in ndê ṅacyo hon sêsôc in gahi ṅapu.

²⁶ Ma ṅacyo ṅambu-nga nan in oc sen su, nan ṅac lai dambac ndu-nga.

²⁷ Sêto yom yêc bocdec bu:

In kên gêṅ hon sêsôc in gahi ṅapu. *[BW 8:6]*

Yom dinan pi 'gêṅ hon,' nan hêganôn Anötö dom, bu Anötö dau kên ṅac lai tēṅ Kilisi pi gêṅ hon.

²⁸ Tigen tēṅ ndoc Anötö ndê Atu dau kên gêṅ hon sêsôc in ndê gôlin ṅapu su, nan goc in dau oc sôc Anötö ṅapu. Ma bocdinan Anötö tigen oc ti ṅadau ma nem gôlin gêṅ hon.

²⁹ Anötö oc un lau batê sa tēṅ tēm ṅambu-nga, yomandô. Bu bocdinan dom, dec tu sake-nga lau ṅatô sêlin sanṅu tu lau nan sêmbac ndu su-nga?*

* **15:29:** Mêtê dau ṅahu yêc awê dom, magoc Pol ndê yom tôte asê bu lau Korin ṅatô sêlin sanṅu tu ṅac si lau nan sêmbac ndu-nga. Mboe lau batê dinan sêkên whin Yisu su, magoc sêlin busanṅu su dom tēṅ ndoc sêmbo tali, ma tu dinan-nga dec lau ṅatô sêlin sanṅu tu ṅac-nga. Pol sôm bu mêtê dinan in solop me so dom, magoc in sôm yom pi mêtê dau tu bu puc in ndê yom pi lau batê sêtisa-nga nan dôn.

³⁰ Ma gauc nem yac lau aposel. Tu sake-nga yac ahôc n̄awapac ti kisa n̄apan̄ tu gwelen̄ n̄awaê n̄ayham-nga?

³¹ O asidôwai. Aö gapo mac nem waêm sa tu mac nem akêñ whiñ yac neñ Pômdau Yisu Kilisi-nga. Mac añyalê bu yom dau iñ yom n̄andô, dec añyalê bu yom dec iñ yom n̄andô bocdinañ. Lau sêkôm bu sêndic aö ndu tôm bêc hoñ.

³² Yêc malac Epesas lau sêkêñ kisa aö gitôm bôclai sac, magoc aö gac siñ têtñ n̄ac ti n̄an̄ga. Magoc lau batê bu sêtisa dom, tôm mac nem lau n̄atô sêsôm, dec aö neñ gwelen̄ n̄awaê n̄ayham-nga iñ n̄amalac n̄ambwa si gêtñ, ma oc nem aö sa dan̄ dom. Bu bocdinañ dec dakôm tôm yom nañ sêto yêc bocdec bu:

Gauc nem gêtñ danen̄ ti danôm-nga en̄, bu n̄asawa apê en̄ yac oc dambac ndu ma dandiñan̄. [*Ais 22:13*]

³³ Ayob daôm bu lau sêtisau mac dom. Gauc nem yom nañ sêsôm bocdec bu, “Mac bu ambo awhiñ lau nañ sêkôm mêtê sac, dec mêtê sac dau oc kôm mac nem mêtê n̄ayham tisac whiñ.”

³⁴ Aö wasôm têtñ mac bu mayam daôm, bu mac nem lau n̄atô sêsa si lêtñ gitôm sem gauc Anötö ma sêsap mêtê sac dôñ n̄apan̄. Bocdinañ akôc gauc n̄apep ma ahu mêtê sac siñ gacgen̄.

Lau oc sêtisa ti n̄amlic kaiñ bocke?

³⁵ Mboe mac nem lau n̄atô oc sêndac, “Anötö oc uñ lau batê sa n̄alêtñ bocke?” me “Lau batê oc sêtisa ti n̄amlic kaiñ bocke?”

36 Yom dau in yom gauc mbasi-nga. Anğô! Gêñ nan mac asô sip nom, nan bu tibalê dom, dec oc po pi meñ dom.

37 Mac bu asô gêñ ñamatu gitôm yangom me gêñ ñawhê ñatô, dec mac asô gêñ dau ñagatôm nan oc po pi meñ tinambu, nan dom, magoc asô ñamatu ñambwa sip nom.

38 Ma Anötö dau kêñ gêñ ñagatôm têtñ gêñ ñawhê tôm in dau kêmasañ su. In kêñ ñagatôm tidau-tidau têtñ gêñ ñawhê tigen-tigen.

39 Ma ñagatôm ti ñamlic nan in kêñ têtñ gêñ hon, nan sêtôm dau d om. In kêñ ñamalac si ñamlic kain dan, ma bôc si kain dan, ma mbac ti i bocdinañ.

40 Gêñ undambê-nga sêmbo ti ñac si ñawasi kain dan, ma gêñ nom-nga sêmbo ti ñac si ñawasi kain dan bocdinañ.

41 Ac ti ayô ma tata hon si ñawasi têtñtêtñ. Ma tata hon si ñawasi gitôm dau dom.

42 Ma têtñ ndoc lau batê sêtisa, nan oc ñalêtñ kain tigen. Lau batê nan tañsuhun sip nom, nan si ñamlic in gêñ têtñ kwahic dec-nga, ma tôm dom bu yêc ñapañ. Magoc Anötö oc un sa ma nem kwi ti gêñ yêc ñapañ-nga.

43 Gêñ nan tañsuhun in gêñ waêmbe, magoc Anötö oc un sa ma kôm ti gêñ tiwaê. Tañsuhun gêñ ñaclai mba, magoc Anötö oc un sa ti ñaclai.

44 Bu yac tañsuhun ñamlic nom-nga, magoc Anötö oc un sa ti ñamlic wakuc undambê-nga. Yac tanjalê bu ñamlic nom-nga dec yêc, ma ñamlic undambê-nga yêc bocdinañ.

45 Anötö kêmasañ ñamalac si ñamlic nom-nga, tôm yom nan sêto yêc bocdec bu:

Ngac ñamata-nga Adam in ti gêñ tali. *[Gen 2:7]*

Ma Adam ñambu-nga, nañ Kilisi dau, nañ tisa ti ñamlic undambê-nga. Ma yac oc dambo tanli tu in-nga, ma datap neñ ñamlic wakuc undambê-nga sa, tòm in ndê.

⁴⁶ Yac dakôc ñamlic undambê-nga muñ dom, magoc dakôc ñamlic nom-nga muñ, ma tinambu oc datap ñamlic undambê-nga sa.

⁴⁷ Ñamalac ñamata-nga meñ akêñ nom. Magoc ñamalac tilu-nga meñ akêñ undambê.

⁴⁸⁻⁴⁹ Kwahic dec yac hoñ dambo datôm ñamalac nom-nga ñamata-nga dinañ. Dinañi sêkôc yac bu dambo datôm ñamalac nom-nga dinañ. Magoc lau nañ sêmbo undambê, nañ sêmbo sêtôm ñ amalac undambê-nga, ma tinambu yac oc datiwakuc, ma dambo datôm ñamalac undambê-nga.

⁵⁰ Bocdinañ aneñ asidôwai, aö wasôm têt mac bu yac datôm dom bu dasôc Anötö ndê gameñ undambê-nga ti neñ ñamlic têt kwahic dec-nga. Bu yac neñ dac ti ñamsôm in gêt yêc ñapañ-nga dom, ma tòm dom bu wêkain gameñ dandöc tanli ñapañ-nga.

⁵¹ Aö bu wasôm yom ñahu atu dan têt mac aňgô. Yac hoñ oc dambac ndu dom, magoc Anötö oc nem yac hoñ kwi ma kêt ñamlic wakuc têt yac.

⁵² Têt bêt ñambu-nga dahuc oc tan, ma sep tigen lau batê oc sêtisa ti ñamlic wakuc sêndöc tali ñapañ-nga. Ma Anötö oc nem yac lau nañ dambo tanli, nañ kwi dawhiñ, ma kêt ñamlic wakuc têt yac.

⁵³⁻⁵⁴ Bu ñamlic nom-nga oc tòm dom bu yêc ñapañ, ma gic waê bu niñga. Bocdinañ têt bêt ñambu-nga Anötö oc nem ñamlic nom-nga kwi ti gêt yêc ñapañ-

nga, nanj tòm dom bu ninnga. Gauc nem yom nanj sêto yêc bocdec bu:

Anötö ku ñaclai dambac ndu-nga dulu su, ma pacndê sambuc. *[Ais 25:8]*

Yom dau oc ñandô sa têtj bêc ñambu-nga.

⁵⁵ O ñaclai dambac ndu-nga, am oc ku yac dulu ñalêtj bocke? Am nem ñamalic ndic yac ndu-nga yêc nde? *[Hos 13:14]*

⁵⁶ Ñamalic nanj wê yac dasa senj dambac ndu-nga, nanj mêtê sac. Ma yomsu kêtj ñaclai têtj mêtê sac.

⁵⁷ Magoc danem danje Anötö nanj ku yac nenj ñacyo dulu tu yac nenj Pômdau Yisu Kilisi-nga.

⁵⁸ Bocdinañ, aneñ asidôwai atac whiñ-nga, alhac ñannga ma ayob daôm bu gêtj danj ku mac dulu dom. Akêtj nem ñalôm sambuc tu Pômdau ndê gwelen-nga. Bu mac anjyalê su bu gêtj bocke nanj mac akôm tu Pômdau-nga, nanj gêtj ñandô mbasi-nga dom. Oc nem ñandô!

16

Sêkêtj da bu sênem lau sêkêtj whiñ-nga ñatô sa

¹ Aö wasôm yom pi awa nanj mac bu andic sa bu anem Anötö ndê lau dabuñ Jerusalem-nga sa. Akôm tòm yom nanj aö gasôm têtj gôlôwac dabuñ nanj sêmbo gameñ Galesia-nga, nanj su.

² Tòm wake ñabêc ñamata-nga sambob, mac tigenj-tigenj andic nem awa da-nga sa tòm awa nanj mac tigenj-tigenj atap sa yêc wake dinañ ñalôm. Andic sa gwanan ma akêtj ndöc. Ma têtj ndoc aö wahôc asê mac yêc malac Korin, nanj oc wakêtj

ņawapac tēņ mac bu andic sa tēņ tēm dinaņ-ņga dom.

³ Aņjaliņ lau ņatô sa naņ mac alic ņayham bu sêkôc mac nem da dau, ma sêkēņ tēņ gôlôwac dabuņ Jerusalem-ņga. Ma tēņ ndoc aô wahôc asê mac, naņ wato bapia puc ņac dôn-ņga ma waņkiņ ņac sēndi.

⁴ Ma aô bu walic tôm bu aô dauņ watēņ Jerusalem wandi, goc yac aņsêlêņ awhiņ dauņ.

Pol ti lau ņatô oc sēndic lau Korin kēsi

⁵ Aô gauc gēm bu wandic lau gameņ Masedonia-ņga kēsi, ma tiņambu watēņ mac waloc.

⁶ Aô bu wambo wawhiņ mac ņasawa baliņ, mboe aô oc wambo e ndoc uhô-ņga pacndê. Ma bocdi-naņ oc tôm bu mac anem aô sa tu seņ bocke naņ wasa tiņambu-ņga.

⁷ Aô gakēņ batañ bu Pômdau oc kēņ ņasawa baliņ tēņ aô tu wambo wawhiņ mac-ņga. Magoc aô bu waloc ņagahô, d ec oc tôm dom bu wambo wawhiņ mac ņasawa baliņ.

⁸ Kwahic dec aô oc gacgeņ wambo malac Epesas e Om †Pentikos-ņga pacndê.

⁹ ņahu bu Pômdau gêlêc gatam su bu wakôm gwelenj atu daņ yêc dindec e ņandô sa. Ma gēņ daņ whiņ, naņ lau daêsam sêkēņ kisa aô yêc dec.

¹⁰ Timoti bu hōc asê mac, naņ goc akōc iņ sa ti yom malô, tu bu iņ mbo whiņ mac ti atac pa su eņ. ņahu bu iņ kôm Pômdau ndê gwelenj tôm aô gakôm.

¹¹ Alic bu lau daņ sêtec iņ me sêpu iņ dom. Ma tēņ ndoc iņ bu mbu tēņ aô meņ, naņ aņkiņ iņ lhō meņ ti yom malô. Aô gakēņ batañ bu ņasawa saun Timoti ma asidôwai ņatô oc sēmbu sêtēņ aô sēmeņ.

12 Yom pi yac neŋ asidôwa Apolos wasôm bocdec bu. Aö gaten in tidim daêsam bu êŋsêlêŋ whin asidôwai ŋatô ma têŋ mac loc. Kwahic dec in sôm bu in oc loc dom, magoc têŋ ndoc in tap ŋasawa ŋayham dan sa, nan in oc loc.

Yom ŋambu-ŋga

13 Anem ali, asap nem mêtê akêŋ whin-ŋga dôn ŋapan, ma alhac ŋanŋa ti nem ŋalôm pêŋ dôn.

14 Ma akôm nem gêŋ hoŋ ti mêtê atac whin-ŋga.

15 O asidôwai. Mac anŋalê bu Stepanas ma lau hoŋ nan sêmbo in ndê andu, nan sêti lau ŋamata-ŋga tu sêkêŋ whin Yisu-ŋga yêc mac nem gameŋ Akaya-ŋga. Ma ŋac sêkêŋ si ŋalôm sambuc tu sênem akiŋ Anötö ndê lau dabuŋ-ŋga. Kwahic dec aö bu wandac mac bocdec bu.

16 Lau kaiŋ dinaŋ, ma lau asa nan sêlhac sêwhin ŋac ma sêkôm gwelen ŋawaê ŋayham-ŋga, nan asôc ŋac ŋapu.

17 Têŋ ndoc Stepanas lu Fotunatas ma Akayakus sêmeŋ akêŋ Korin ma sêhóc asê aö, nan sêkôm aö atac ŋayham atu. Ŋahu bu ŋac sêkôc mac hoŋ anôm sêtêŋ aö sêmeŋ.

18 Ŋac sêkôm aö neŋ ŋalôm tighô, tôm sêkôm mac nem ŋalôm tighô têŋ têm sêmbo sêwhin mac. Tu dinaŋ-ŋga dec wasôm têŋ mac bu atoc lau kaiŋ dinaŋ sa ŋapep.

Pol ti lau ŋatô sêkôm acsalô têŋ lau Korin-ŋga

19 Gôlôwac dabuŋ titoŋ-titoŋ hoŋ nan sêmbo gameŋ Esia-ŋga dindec, nan sêkêŋ si acsalô ŋayham têŋ mac hoŋ. Ma Akwila lu Prisila ti gôlôwac dabuŋ nan sêkac sa yêc inlu si andu, nan sêkêŋ acsalô ŋayham ti atac whin têŋ mac tu Pômdau-ŋga.

²⁰ Ma asidôwai hon nan sêmbô gameŋ dindec sêkêŋ acsalô têŋ mac bocdinaŋ. Mac hon akam daôm, aŋkuc Anötö ndê lau dabuŋ si lêŋ.

²¹ Aö Pol gato yom dindec ŋa daun aman tu bu wakêŋ aneŋ acsalô têŋ mac-ŋga.

²² Ŋamalac daŋ bu atac tec Pômdau, nan Anötö pucho iŋ. O Pômdau, mbu mweŋ!

²³ Pômdau Yisu ndê mwasin têŋ mac.

²⁴ Aö bu wakêŋ aneŋ atac whin têŋ mac lau akêŋ whin Yisu Kilisi-ŋga hon.

Anötö ndê Yom Lêṛsêṃ Wakuc
The New Testament in the Bukawa language of Papua
New Guinea
Nupela Testamen long tokples Bukawa long Niugini

copyright © 2000 Lutheran Bible Translators Australia

Language: Bukawa

Translation by: Lutheran Bible Translators Australia

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 18 Apr 2025 from source files dated 31 Aug 2023

545e5ca3-1e95-59e4-8380-93951e023cf7